


ABRIL 2018

AMATL TEKAKISTILIJKETL

KITEIJLITIKA I TEKIUAJYO JEHOVÁ



TLEN TOMACHTISKEJ
ITECH 4 JUNIO-8 JULIO 2018



TLAIXKOPINAJLI TLEN NESI IXPAN: KIRGUISTÁN

Omemej precursores especiales tenojnotsaj ipan se kalpan tlen uejka onka itech yejuin país, nisiuj itech ueyikalpan Balykchy.

AKIN TENOJNOTSAJ

5,235

AKIN KINMACHTIAJ ITECH BIBLIA

4,653

AKIN ONOSENTLALIJKEJ IJKUAK
NOILNAMIKI IMIKILIS CRISTO (2017)

10,067

TLEN KIPIYA

3 IPAN SEMANA 4-10 JUNIO
Kenon tikpiyaskej
melauak tlamakualistli

8 IPAN SEMANA 11-17 JUNIO
Matiktekichiuilikan Jehová,
toTajtsin itech tlamakualistli

Nochiuiyan, tlaltikpakchanejkej kinekij kipiymaskej tlamakualistli. ¿Kenon noneki kitaskej tlamakualistli akin kichiuaj ken Cristo? Yejuin ome tlamachtiltin tlajtoskej itech tlenon kijtosneki melauak tlamakualistli, kenon uelis tikpiymaskej niman kenon tiktekitiliskej tlamakualistli tlen tikpiyaj itech seki tlemach niman ijkon matechpaleui niman noijki makinpaleui oksekimej. Niman kuajli tikitaskej kenon tikueyichiuaskej Jehová, toTajtsin itech melauak tlamakualistli.

13 Tlayekankej niman tlapaleuijkej,
xkixkopinakan Timoteo

15 IPAN SEMANA 18-24 JUNIO
Matikixkopinakan Jehová,
toTajtsin akin teyolchikaua

20 IPAN SEMANA 25 JUNIO-1 JULIO
Aman noneki “más ma toyoleuakan”
semej iuan oksekimej

Yejuin tlamachtiltin techititiaj ika Jehová nochipa yokinyolchikauj itekipanojkauan. Niman itech miyek xiujtin, itekipanojkauan noijki yokixkopinkej inesakayo. Tikitaskej tleka aman melak ueyi kijtosneki mato-yolchikauakan semej iuan oksekimej.

25 IPAN SEMANA 2-8 JULIO
Telpokamej, ¿nenkitejtemojtokej
chikauak nenkitekichiuiliskej toTajtsin?

Telpokamej akin kichiuaj ken Cristo kuajli onkisaskej tla kitejtemouaj kiyolpaktiskej Jehová. ¿Tlenon techititia ika melak kuajli tla kitejtemouaj chikauak kitekichiuiliskej toTajtsin niman kachtopa kitejtemouaj tenojnotsaskej? Yejuin tlamachtijli technankilis yejuin.

30 TLEN NOTLAJTOLTIAJ AKIN
KITAJ REVISTAS

Yejuin amatlajkuilolji xno-nemaka. Noxeloua ipan nochi tlaltikpaktli, tepaleuiya tikasikamatis Biblia niman nochia ika tomin tlen kitemakaj tlaltikpakchanejkej ika nochi inyojlo.

Tla tikneki tiktemakas tomintsin xkalaki ipan www.jw.org.

Textos tlen uajlauej ipan Tlajkuiloltin ika hebreo onokixtijkej itech *Traducción del Nuevo Mundo de las Santas Escrituras*, niman onotlajtolkuep ika náhuatl de Guerrero. Niman textos tlen uajlauej ipan Tlajkuiloltin ika griego, onokixtijkej itech Biblia *In Yencuic lyectlajtoltzin Dios ican Náhuatl de Guerrero*; san ika, onojkuilo ken aman noijkuiloua náhuatl. Ijkuak tikitas ijkuilujtok *TNM* kijtosneki onokixti itech *Traducción del Nuevo Mundo de las Santas Escrituras*.

AMATL **TEKAKISTILIJKETL**
KITEJLITIKA I TEKUJAYÓ JEHOVÁ

The Watchtower is published monthly by Watchtower Bible and Tract Society of New York, Inc. © 2018 Watch Tower Bible and Tract Society of Pennsylvania.

Abril de 2018
Vol. 4, núm. 5 NÁHUATL DE GUERRERO



Kenon tikpiyaskej melauak tlamakaualistli

“Kuakon, tla Tekoneuj mechmakaua, yemelak nentlamakaualtin yeskej”

(JUAN 8:36, TNM).

AMAN, melak tlajtouaj itech xtitechikoitas niman tikpiyas tlamakaualistli. Miyekan ipan tlaltikpaktli, nemij akin kinekij nomakauaskej itech tlajyouilistli, itech ken kinchikoitaj niman itech mayantli. Oksekimej kitlajtlanij makinkauilkan makijtokan tlen kinemiliaj, kichiuaskej tlen yejuamej kitaj kuajli niman nemiskej ken kinekiskej. No-chimej kinekij kipiymaskej tlamakaualistli.

² Pampa kinekij kipiymaskej, nosentlaliaj niman ontetsajtsiliaj, niman hasta teixnamikij niman tlausokij. San ika, yejuin xkichuia makipiyakan tlen kinekijaj, miyekpa san kichiuaj maonia tlajyouilistli niman ika sekimej mamikikan. Ijkon, oksejpa nesi ika melauak yejon tlajtolitn tlen toTajtsin okichiuaj makijkuilo tekiuaj Salomón: “Tlakatl yokinyekan tlaltikpakchanejkej niman ijkon matlajyouikan” (Ecl. 8:9).

³ Santiago, se inomachtijkauj Jesús, okijto tlenon noneki tikchiuaskej niman ijkon yemelak tipakiskej niman tinemiskej ika toyojlo. Yejua okijkuilo ika paki akin mojmotla “kinomachtia ikan nochiiyojlo on tlanauatijli yejuan ajsitikaj niman yejuan techmanauiya”

1, 2. a) ¿Tlenon techititia ika tlaltikpakchanejkej melak kitejtemouaj kipiymaskej tlamakaualistli? b) ¿Kenon ontلامي tlen kichiuaj?

3. ¿Tlenon uelis tikchiuaskej niman ijkon yemelak tipakiskej niman tinemiskej ika toyojlo?

TLAKUIKALTIN: 54, 36

¿UELIS TIKIJTOS KEN OTIKASIKAMAT?

¿Itech tlenon tlaltikpakchanejkej uelis kipiymaskej tlamakaualistli, niman tleka?

¿Kenon opoliuj melauak tlamakaualistli?

¿Itech tlen tlamakaualistli otlajto Jesús niman kenon uelis tikpiymaskej?

(Sant. 1:25). Jehová yejua akin okitemakak yejon tlanauatijli tlen “ajsitika”, niman ika yejon, yejua akin melak kuajli kimati tlenon noneki niman ijkon tipakiskej niman tinemiskej ika toyojlo. Okinmakak Adán niman Eva nochi tlen nonekiya niman ijkon mayolpakikan, niman noijki okinmakak melauak tlamakaualistli.

IJKUAK TLALTIPAKCHANEJKEJ KIPYAYAJ MELAUAK TLAMAKAUALISTLI

⁴ Kachtopa ome uejueyimej tlaxeloltin itech amoxitli Génesis kuajli techititaj ika ipan Xochitlalpan xonkatka mayantli, mojkayotl nion tlajyouilistli. Adán niman Eva kipyayaj se tlamakaualistli tlen aman tlaltipakchanejkej san kitemikij. Yejuamej xkipyayaj ika najmanaskej ipampa tlen kikuaskej, itech tekitl, itech kokolistli nion itech mikilistli (Gén. 1:27-29; 2:8, 9, 15). ¿Kijtosneki yejuin ika Jehová okinkauilijka makichiuakan nochi tlen kinekiskiaj niman makijtokan tlenon kuajli niman tlenon xkuajli? Matikitakan.

⁵ Nemij akin kineltokaj ika melauak tlamakaualistli kijtosneki ika se uelis kichiuas nochi tlen kinekis maski san tlenon mapano. Noijto-uani ika tlamakaualistli kijtosneki uelis tiktlapejpenis tlen tikchiuas niman tikchiuas tlen yotikijto. San ika, se enciclopedia kijtoua yejuin: “Tla tikitaj yejuin itech tlen kijtouaj tlanauatiltin, tlakamej kipyayaj tlamakaualistli ijkuak xkintlajtlaniliaj makichiuakan tlen xmelajki, tlen xnoneki noso tlen nion xkuajli ononemili” (*The World Book Encyclopedia*). Itech yejuin tikasikamatij ika ipan tonemilis noneki maonia seki tlemach tlen matechtelti, pampa san ijkon tinochimej uelis topaleuiskej itech tlamakaualistli. Kuakon, tlen noneki matikmatikan yejua akinon kinamiki makijto katlejuu itech yejon tlemach nonekij, melajkej niman uelij nochiaj.

4. ¿Itech tlenon Adán niman Eva kipyayaj tlamakaualistli? (Xkita tlaixkopinaajli kampa peua tlen to-machtijtokej).

5. Maski miyekej xijkon kinemilijaj, ¿tlenon noneki maonia niman ijkon tikpiyaskej tlamakaualistli?

⁶ Itlaj tlen xnoneki tikilkauaskej yejua ika san Jehová kipyaj tlamakaualistli itech nochi. Yejuin ijkon pampa yejua akin okichijchiuj nochi, akin nochi ueli kichiuu niman akin Ueyix-tika (1 Tim. 1:17; Apoc. 4:11). Matikilnamikikan yejon kualtsitsintin tlajtoltn tlen okijto David ipan **1 Crónicas 29:11, 12 (xpoua).*** Ompa okijto kenon Jehová melak ueyixtika. Niman, oksekimej akin yoltokej ipan iluikak niman tlaltipaktli kipyaj tlamakaualistli san itech seki tlemach. Noneki tikselskej ika Jehová kipyaj nochi tlanauatijkayotl ika kijtos hasta kanon toteltiskej, niman tlen kitlajtlani yejua yokitak ika noneki, melajki niman ueli nochia. Niman yejon tlen okichij ikuak opeuj kichijchiua nochi.

⁷ Maski ijkuak opeujkej nemij Adán niman Eva kipyayaj tlamakaualistli niman ueliyaj kichiuayaj miyek tlemach, Jehová okitlali seki tlen nonekiya kichiuaskej. Maski seki itech yejon yonomatka kichiuaj, xyejuamej kitlapejpeniaj kichiuaskej. Se neskayotl, tla kinekiyaj nemiskej, nonekiya nijyotiskej, tluaskej niman kochiskej, niman okseki tlemach. San ika, xkinemilijaj tla yejuin kin-kuiiaya intlamakaualis. Jehová okichij ika mapakikan maski nonekiya mojmotla kichiuaskej yejuin (Sal. 104:14, 15; Ecl. 3:12, 13). ¿Xmelak ika tinochimej tikuelitaj tikijyotilanaskej ajakatl tlen chipauak niman seseksín, tikjuaskej tlen melak tikuelilijaj noso tokuite-

* 1 Crónicas 29:11, 12: “Moyaxka, oh Jehová, ueyilistli niman kojtilistli niman tlen kualtsin niman tlen ueyixtika niman tlen notlakaita, pampa nochi tlen onka ipan iluikak niman ipan tlaltipaktli tejua moyaxka. Moyaxka tekiujayotl, oh Jehová. Tejua Akin timoueyilia ken tlayekanketl itech nochi. Tlen patioj niman tlen ueyixtok motech ualeuaj, niman tejua titlanauatia ipan nochi, niman ipan moma onka chikaualistli niman kojtilistli, niman moma ueli teueyichia niman ueli kinmaka nochimej chikaualistli”.

6. a) ¿Tleka san Jehová kipyaj tlamakaualistli itech nochi? b) ¿Itech tlenon tlaltipakchanejkej uelis kipyaskej tlamakaualistli, niman tleka?

7. Xkijto seki tlen xtejuamej tiktlapejpeniaj tikchiuaskej, san ika, yotomatkej tikchiuaj niman tech-yolpaktia.

uaskej sakin ika kuajli otikochkej? Xtikmachiliaj ika tisalijtokej noso yetik tikchiusaskej yejuin. Ka, tipakij tikchiusaskej yejon, niman kuajli tikmatij ika Adán niman Eva noijki kinpaktiaya.

⁸ Jehová okinnauati Adán niman Eva makitemiltikan niman makitlajpiyakan tlaltikpaktli (Gén. 1:28). ¿Okinkuili yejuin tlanauatijli tlamakaualistli tlen kipiayaj? Ka, xijkon opanok. Yejuin kinkauiliaya nochimej tlaltikpakchanejkej matlapaleuikan itech tlen toTajtsin kineki: ika tlaltikpaktli manochiua se xochitlalpan kampa tlaltikpakchanejkej manemikan nochipa (Is. 45:18). Ipan yejuin tonajli, akin kitlapejpeniaj xnonamiktiskej niman noijki akin yononamiktijkej san ika xkinekij kipiayaskej inkoneuan xkixnamikij tlen kineki toTajtsin. Maski san kenon, miyekej nonamiktiaj niman kinpiyaj inkoneuan maski yejon tlen kitlapejpeniaj kichiua makipiyakan tlaueitlin (1 Cor. 7:36-38). ¿Tleka kichiua? Pampa, tla nochi kuajli kisa, yejuin kichiua kuajli manomachilikan niman mapakikan (Sal. 127:3). Ken tikitaj, Adán niman Eva ueliskiaj nochipa kinyolpak-tis innamiktillis niman inkoneuan.

KENON OPOLIJJ MELAUAK TLAMAKAUALISTLI

⁹ Jehová okinmakak Adán niman Eva okse tlanauatijli, niman aman kuajli okimijli tlenon xkuajli inpan nochiuaskia tla xkitlakamatiajaj: “San ika, yejon kojtl tlen tetlalnamiktia, ika san nejua nechnamiki nikijtos tlen kuajli niman tlen xkuajli, maka tijkuas, pampa yejon tonajli ijkuak tejua tijkuas, timikis” (Gén. 2:17). ¿Nonekiya, melajki katka niman ueliya nochiuaya yejon tlanauatijli? ¿Kinkuiliaya seki itech tlamakaualistli tlen kipiayaj? Ka. Niman xsan yejon, miyekej ixtlamatkej itech Biblia kijtouwaj ika yejuin tlanauatijli kuajli katka. Se neskayotl, se intech yejuamej kijtouwaj ika Gé-

nesis 2:16, 17 techmachtia ika “san toTajtsin kimati tlenon kuajli [...] inpampa tlakamej niman noijki kimati tlenon xkuajli [...] inpampa yejuamej. Tla kinekij pakiskej itech ‘tlen kuajli’ noneki tlaneltokaskej itech toTajtsin niman kitlakamatiskej. Tla xijkon kichiua, nonekis inselti kitlapejpeniskej tlenon kuajli niman tlenon ka”. Niman yejuin se ueyi tekittl tlen san yejuamej xuelis kichiuaskej.

¹⁰ Miyekej ipan yejuin tonaltin kinemiliaj ika tlanauatijli tlen toTajtsin okimakak Adán kijtosnekiya ika xkinkauilijtoskia makichiuakan tlen yejuamej kinekiskiaj. San ika, yejon xmelauak. Xsan noijki kijtosneki tiuelis tiktlapejpenis tlenon tikchiuas niman tiuelis *tejua tikijtos tlenon kuajli niman tlenon xkuajli*. Adán niman Eva kipiayaj tlamakaualistli ika kitlapejpeniskej tla kitlakamatiskej toTajtsin noso ka. San ika, san Jehová kinamiki kijtos tlenon kuajli niman tlenon xkuajli. Yejon tlen kineskayotiaya kojtl tlen tetlalnamiktia tlen kuajli niman tlen xkuajli tlen onkatka ipan Xochitlalpan Edén (Gén. 2:9). Noneki tikselskej ika xnochipa tikmatij tlen panos ijkuak itlaj tiktlapejpeniaj tikchiusaskej nion xnochipa kuajli tikmatiskej tla techpaleuis. Ika yejon, kemitika ijkuak yakaj ika kuajli iyojlo kitlapejpenia kichiuas itlaj, miyekpa kichiua maonia tlajy-uulistli, mapano tlen xkuajli noso itlaj tlen temojti (Prov. 14:12). Niman yejuin panoua pampa tlaltikpakchanejkej xuelij kichiua nochi. Ika tlanauatijli tlen Jehová okinmakak Adán niman Eva, kiminmachtijtowa ika nonekiya kitlakamatiskej niman ijkon yemelak kipi-yaskej tlamakaualistli. ¿Tlenon okitlapejpenij-kej kichiuaskej?

¹¹ Teajman ika Adán niman Eva okitlapejpenijkej xtetlakamatiskej. Eva nion xouel okixiko yejuin tlatlatalistli tlen okitlalili Satanás:

10. ¿Tleka xsan noijki kijtosneki tiuelis tiktlapejpenis tlenon tikchiuas niman tiuelis tejua tikijtos tlenon kuajli niman tlenon xkuajli?

11, 12. ¿Tleka melak xkuajli otlamito tlen okitlapejpenijkej kichiuaskej Adán niman Eva? Xkijto se neskayotl.

8. ¿Tlen tlanauatijli Jehová okinmakak Adán niman Eva, niman tleka?

9. ¿Tleka nonekiya, melajki katka niman ueliya nochiuaya tlen otlanauati toTajtsin ipan Génesis 2:17?



“Nemixtlapouiskej niman nemochiaskej ken toTajtsin, nenkixmatiskej tlen kuajli niman tlen xkuajli” (Gén. 3:5). San ika ¿ouel okipixkej miyek tlamakaualistli Adán niman Eva? Ka. Tlen okitlapejpenijkej xokinmakak tlen Satanás okimijlika. Niman xsan yejon, nimantsin okitakej ika tla tikmapeuas itlayekanalís toTajtsin niman san tejua timoyekanas melak xkuajli tontlamis (Gén. 3:16-19). ¿Tleka ijkon panoua? Xouijtika, pampa Jehová xokinchiychiuj taltikpakchanejkej sa no yejuamej mauelikan makitlapejpenikan tlenon kuajli niman tlenon xkuajli (**xpoua Proverbios 20:24; Jeremías 10:23**).[#]

¹² Matikitakan se neskayotl itech akin kuika se avión. Yejua kuajli ajsi kampa yauj pampa kitoka se ojtli tlen achtopa yonoitak ika kuajli. Noijki, uelis kitas aparatos tlen ika noyekanaj akin kuikaj aviones niman nonotsas imiuan akin kitstokej kechmej aviones nemij iluikak. Aman tej, tla kimapeuaskia nochi yejuin tlen tepaleui niman yaskia kampa yejua kinekiskia, ueliskia panos itlaj tlen xkuajli. Itlaj

* Proverbios 20:24: “Ken cholojtuij se tlakatl kiyekana Jehová; ¿kenon uelis se tlakatl kasikamatis iojui?”.

Jeremías 10:23: “Nejua kuajli nikmatstika, Jehová, ika taltikpakchane xueli noyekana. Se taltikpakchane nion xkimati kanon cholos ijkuak nejnemi”.

ken yejuin okichiujkej Adán niman Eva. Okimapeujkej tlayekanalistli tlen okinmakaka toTajtsin, niman melak xkuajli okisatoj; onochiujkej tlajtlakolejkej niman omijkej, niman noijki ijkon inpan panoskia inkoneuan (Rom. 5:12). Pampa kinekiyaj nemiskej ken yejuamej kinekiyaj, okipolorejkej melauak tlamakaualistli.

KENON UELIS TIKPIYASKEJ MELAUAK TLAMAKAUALISTLI

¹³ Miyekej taltikpakchanejkej kinemiliaj ika tla kipiay miyek tlamakaualistli melak kuajli ontlamiskej. San ika, tlen melauak, tlamakaualistli tlen xtlaj kiteltia melak teijtlako ken se cuchillo tlen melak tlateki. Melauak, tikpiyas tlamakaualistli mitspaleuis. San ika ¿kenon yeskia taltikpaktli tla xoniaskia itlaj tlen matechtelti? Ipampa yejuin, enciclopedia tlen onoteneuj ipan párrafo 5 kijtousa: “Itlanauatiluan taltikpakchanejkej akin kuajli noyekanaj kichiuj ika maonia tlen uelis se kichiuas niman noijki tlen xuelis kichiuas”. Yemelak, yejuin itlaj tlen ouijtika. San matikonnemilikan kenon melak miyek tlanauatiltin tlen tla-

13, 14. ¿Kenon uelis tikpiyaskej melauak tlamakaualistli?



Tlen okitlapejpenijkej kichiuaskej Adán niman Eva melak xkuajli ken otlamito. (Xkita párrafos 9-12).

kamej yokimijkuilolkej, niman noiiki kenon melak miyekej abogados niman teyolkuitijkej nonekij niman ijkon makiteasikamachiltikan niman makintekitiltikan.

¹⁴ San ika, Jesucristo okijto kenon nion xouijtika tikpiyaskej melauak tlamakaualistli. Okijto: “Tla nennmelajkanemiskej ipan on tlen nemechijlia, nemochiuaskej melauak nenno-machtijkauan. Nenkixmatiskej tlen melauak, niman on tlen melauak yejua mechmanauis [noso mechmakas tlamakaualistli]” (Juan 8: 31, 32). Toyekanaskej ika tlen okijto kijtosneki tikchiuaskej ome tlemach. Kachtopa, tikselis-kej tlamachtijli itech tlen melauak tlen yejua otemachti. Niman ika ome, tochiuaskej ino-machtijkauan. Tla tikchiuaj, tikpiyaskej melauak tlamakaualistli. ¿Tlamakaualistli itech tlenon? Jesús sakín okijto: “Nochimej yejuan tlajtakouaj, yejuamej tlanamaktin itech on tlajtakojli”. Niman noiiki okijto: “Kuakon, tla Tekoneuj mechmakaua, yemelak nentlamakaualtin yeskej” (Juan 8:34; Juan 8:36, *TNM*).

¹⁵ Kuajli nestika ika tlamakaualistli tlen Jesús okijto kinmakas inomachtijkauan melak

15. ¿Tleka tlamakaualistli tlen Jesús okijto techmakas yejon tlen kichia yemelak matikpiyakan tlamakaualistli?

ueyi xijkon ken tlamakaualistli tlen miyekej kinnekij itech ken nemiskej noso itech política. Ijkuak yejua okijto “tla Tekoneuj mechmakaua, yemelak nentlamakaualtin yeskej”, tlajtotoya ika techmakaua itech tlen melak kintlajyouiltia taltikpakchanejkej: ika titlanamaktin “itech on tlajtakojli”. Tlajtakojli xsan kichia matikchiuakan tlen xkuajli, noiiki xtechkauilia matikchiuakan tlen tikmatstokej ika kuajli noso nochi tlen tiueliskiaj. Yejuin tlen kijtosneki ika titlanamaktin itech tlajtakojli. Yejuin kichia matajmanakan, matitlajyouikan niman, sa ika nochi, matimikikan (Rom. 6:23). Apóstol Pablo kuajli kimatiya tlenon kijtosneki titlanamaktli yes (**xpoua Romanos 7: 21-25**). San ijkuak xok tikpiyaskej tlajtakojli, tlen yeskia ken se cadena tlen ika tislajtokej, hasta ijkuakon topaktiskej itech melauak tlamakaualistli tlen okipololkej Adán niman Eva.

¹⁶ Ijkuak Jesús okijto ika noneki timelajkanemiskej ipan itlajtol, kijtosnekiya ika noneki tikchiuaskej seki tlemach niman ijkon techmakas tlamakaualistli. Akin tikchiuaj ken Cristo xtiktejemouaj tlen tiknekij, tiktlapejpeniaj tiktlakamatiskej itech tlen yejua kinnauatia inomachtijkauan manoteltikan (Mat. 16:24). Ijkon ken okijto, tikpiyaskej melauak tlamakaualistli ijkuak kichias matikselikan nochi tlateochiualistin tlen techmaka tlaxtlauijli.

¹⁷ Tiktlakamatiskej itlamachtilian Jesús kichias matikmatikan tleka tinemij niman matiyolpakikan ipan tonemilis. Niman yejuin kichias ika tlayekapan matikpiyakan melauak tlamakaualistli itech tlajtakojli niman mikilistli (**xpoua Romanos 8:1, 2, 20, 21**). Ipan okse tlamachtijli, tikitaskkej kenon uelis kuajli tiktekitiltiskej tlamakaualistli tlen tikpiyaj aman niman ijkon nochipa tikueyichiuaskej Jehová, toTajtsin itech melauak tlamakaualistli.

16. ¿Kenon uelis tikpiyaskej melauak tlamakaualistli?

17. a) ¿Tlenon kichias matikmatikan tleka tinemij niman matiyolpakikan ipan tonemilis? b) ¿Tlenon tikitaskkej ipan okse tlamachtijli?



Matiktekichiulikan Jehová, toTajtsin itech tlamakaualistli

“Kampa onka iespíritu Jehová, onka tlamakaualistli”

(2 COR. 3:17, TNM).

TLAKUIKALTIN: 49, 73

¿KENON TITLANANKILISKIA?

¿Kenon yotechmakak tlamakaualistli iespíritu Jehová?

¿Tlenon uelis tikchiaskej niman ijkon xtiktekiltiskej ken xkinamiki tlamakaualistli tlen Jehová yotechmakak?

¿Tlenon uelis tikchiaskej niman ijkon kuajli tiktekiltiskej totlamakaualis?

AKIN chantiyaj kampa tlanauatiayaj romanos melak noueyimatiyaj pampa kitlajpiayaj tlanauatiltin, melajkayotl niman tlamakaualistli. San ika, ikojtis niman iueyilis yekon tekiuajyotl ouel onopix inpampa intekiyo tlakeuالتin. Oajsik tonajli ijkuaك 30% itech no-chimej akin ompa chantiyaj tlakeuالتin katkaj. Tikmatstokej ika ti-tlakeuajli noso titlamakauajli yes yejua itlaj tlen kinajmanaya akin xuejueyixtoyaj, niman noijki akin kichiuayaj ken Cristo akin ompa chantiyaj.

² Apóstol Pablo ipan iamatlajkuiloluan miyekpa otlajto itech tlamakaualistli. San ika, yejua xkitejtemouaya tlen kinekiyaj tlatikpakchanekej, akin kinekiyaj kiyektlaliskej kenon nemiyaj niman noijki política. Pablo niman oksekimej akin kichiuayaj ken Cristo nokojtiliayaj kinpaleuskej tlatikpakchanekej makixmatikan kuajli tlajtoltin itech iTekiujayto toTajtsin niman kenon ueyi kijtosomeki tlatlauijli tlen okichiuaj Jesús. Pablo okimijli imikniuan itech akinon ualeua melauak tlamakaualistli. Se neskayotl, ipan ika ome iamatlajkuilol tlen okintitlanili akin kichiuayaj ken Cristo ipan Co-

1, 2. a) ¿Tleka ipan tonaltin ijkuaك nemiya Pablo tlatikpakchanekej kinajmanaya titlakeuajli niman titlamakauajli yes? b) Ken Pablo okijto, ¿itech akinon ualeua melauak tlamakaualistli?

rinto, kuajli okimijli: “Jehová yejua Espíritu, niman kampa onka iespíritu Jehová, onka tlamakaualistli” (2 Cor. 3:17, TNM).

³ Ipan yejon amatlajkuilojli tlen okintitlanili corintios, Pablo kemach yokonijtoka tlen ipan onochiuj Moisés ijkuak ouajtemok itech tepetl Sinaí sakín ika ixpan okinojtiti se iilui-kaktekitkauj Jehová. Ixayak melak petlaniya. Ijkuak israelitas okitakej, onomojtijkej, ika yejon, yejua onixtlapacho ika se tlakentli (Éx. 34:29, 30, 33; 2 Cor. 3:7, 13). Pablo ote-tomili ika, ijkuak yakaj uajnokuepa itech Jehová, “on tlakentli yejuan kixtlapachoua popoliui” (2 Cor. 3:16). ¿Tlenon okijtosnek?

⁴ Ken otíuelkej ipan okse tlamachtijli tlen otikitakej, Jehová, akín okichijchiuj nochí tlen onka, yejua akín kipiya tlamakaualistli itech nochí niman akín kinamiki nochípa kijtos tlenon kuajli niman tlenon xkuajli. Ika yejon, onka tlamakaualistli kampa yejua nemi niman kampa onka iespíritu. Aman tej, tla tikneki tikpiyaskej yejon tlamakaualistli niman noijki matechpaleui, noneki tokuepaskej itech Jehová. Yejuin kijtosneki ika noneki matiktejtemokan kuajli iuan touikaskej. Israelitas akín nejnemiyaj ipan tlatluaktli okitakej tlen panotoya san ken tlatikpakchanejkej kitaj niman xken Jehová kita. Kentla se tlakentli kintlapachouilijtoskia intlanemililuan niman inyojlo. San kinekiyaj kitekitiltiskej intlamakaualis ika kipiymaskej tlen kileuiayaj (Heb. 3:8-10).

⁵ San ika, tlamakaualistli tlen techmaka Jehová melak kuajli xijkon ken xsan tisauktos. Iespíritu Jehová techmakaua itech tlajtlakojli niman mikilistli, niman noijki

3, 4. a) ¿Itech tlenon tlajtotoya Pablo ipan seki tlaxeloltin tlen onka ikuitlapan 2 Corintios 3:17? b) ¿Tlenon kipiya tikchiusaskej niman ijkon tikpiyaskej tlamakaualistli tlen ualeua itech Jehová?

5. a) ¿Tlen tlamakaualistli techmaka iespíritu Jehová? b) ¿Kenon tikmatij ika uelis kipiymas tlamakaualistli tlen temaka Jehová akín tlakeuajli noso tsauktika? c) ¿Tlen tlajtoltilistin noneki tikinnankiliskej?

itech tlaneltokijli tlen xmelaauak niman tlen ompa nochíua. Yejuin itlaj tlen tlakamej xkeman uelis kichiusaskej (Rom. 6:23; 8:2). Yejuin se tlamakaualistli tlen melak kualtsin. Niman uelis kipiymas hasta akín nemi ken tlakeuajli noso tsauktika ipan cárcel (Gén. 39:20-23). Yejuin tlen ipan onochiuj tokniuj Nancy Yuen niman Harold King. Yejuamej okintsajkej miyek xiujtin ipampa intlaneltokil. Uelis tikimitaskej niman tijkakiskej tlen inpan onochiuj ipan JW Broadcasting (VIDEOS > ENTREVISTAS Y EXPERIENCIAS > SE ENFRENTAN A PRUEBAS). San ika, aman noneki matikitakan yejuin tlajtoltilistin: ¿Kenon tikteititiaj ika tikpatiojkitaj totlamakaualis? Niman ¿tlenon uelis tikchiusaskej niman ijkon kuajli tiktekitiltiskej?

MATIKPATIOJKAITAKAN TLAMAKAUALISTLI TLEN TOTAJTSIN YOTECHMAKAK

⁶ Ijkuak yakaj techtlayokolía itlaj tlen ueyi kijtosneki, melak tiktlasojkamachiliaj. Noijki ijkon, Jehová okintlayokoli israelitas tlamakaualistli ijkuak okinkixti itech Egipto, kampa nemiyaj ken tlakeualtin. ¿Kenon okitakej tlen okiselijkej? San seki metstin sakín ika okinmakixtijkej, opeujkej melak kitejtemouaj tlen kikuayaj niman tlen koniyaj Egipto, niman opeujkej xkuajli tlajtouaj itech tlen Jehová kinmakaya. Hasta okijtokej ika kinekiyaj nokuepaskej Egipto. Yejuamej melak kipatiojkaitayaj michimej, xonakamej, pepinos, sandías, puerros niman ajos xijkon ken tlamakaualistli tlen kipiayaj ika kiueyichiusaskej Jehová. Xtechmojkatlachialtia ika Jehová sajnoye okualan (Núm. 11:5, 6, 10; 14:3, 4). Itech yejuin tiuelij itlaj tlen melak ueyi kijtosneki.

⁷ Apóstol Pablo okinyolchikauj nochimej akín kichiuaj ken Cristo makipatiojkaitakan

6. ¿Kenon okiteititijkej israelitas ika xkipatiojkaitayaj tlamakaualistli tlen Jehová okinmakaka?

7. a) ¿Kenon okichij ipan inemilis Pablo tlen sa no yejua okijto ipan 2 Corintios 6:1? b) ¿Kenon tejua-mej noijki uelis ijkon tikchiusaskej?

tlamakaualistli tlen Jehová otechmakak itechkopa iKoneuj, Jesucristo (**xpoua 2 Corintios 6:1, TNM**).^{*} Matikilnamikikan kenon Pablo melak xkuajli nomachiliaya pampa katka se tlakeuajli itech tlajtlakojli niman mikilistli. Maski ijkon, Pablo okichiu tlen sa no yejua oteyolchikauj: “Nikmaka tlaxtlauijli Dios ika san itechkopa toTeko Jesucristo ueli nechmakixtia”. ¿Tleka? Otetomili: “Itechkopa Jesucristo on tlanauatijli yejuan kisa itech on Espíritu Santo yonechmanauij itech on tlanauatijli de tlajtlakojli. On tlanauatijli de tlajtlakojli nechui kaya ipan mikilistli, pero aman on Espíritu Santo nechui ka ipan nemilistli” (Rom. 7:24, 25; 8:2). Tejuamej noijki matikpatiojkaitakan ika Jehová otechmakauj itech tlajtlakojli niman mikilistli, tlen techpiayaj ken tlakeualtin. Ipampa yejuin tlaxtlauijli, uelis tiktekichiuliskej Jehová ika totlamachilis chipauak niman yejuin kichiu matapikikan (Sal. 40:8).

⁸ Ijkon ken noneki tiktlasojkamatiskej, noijki kipiya totlajpiyaskej maka tiktekiltiskej ken xkinamiki totlamakaualis. Apóstol Pedro otechmelajkaijli maka matijkuikan yejuin tlamakaualistli ika tikchiusaskej tlen xkuajli tikileuiyaj (**xpoua 1 Pedro 2:16**). Yejuin tlen otechmelajkaijli techilnamiktia tlen okichiu kejs israelitas ipan tlatuaktli. Ipan yejuin tonajli melak techpaleuiyaj yejuin tlajtoltin, kanaj xijkon ken ipan yejon tonaltin. Satanás niman tlatikpaktli tlen kiyekana, mojmotla kikixtia miyek tlemach tlen tikuelitas itech tlakentli, tlakuajli niman tlen tikonis, niman itech tlen ika timoyolpaktis, niman itech okseki. Ijkuak techititaj nochi yejuin miyekpa kintlajaj akin kualtsin nesij niman ijkon techtlaneltokiltiskej ika noneki

^{*} 2 Corintios 6:1: “Matitekitakan san sekan iuan yejua, tejuamej noijki timechtlajtlani ika maka san xselikan iteiknelilis toTajtsin niman xnenkichiusaskej tlen yejua kineki manochiua”.

8, 9. a) ¿Tlenon okijto Apóstol Pedro itech ken tiktekiltitaj tlamakaualistli? b) ¿Tlenon uelis techijtlakos ipan yejuin tonaltin?

tijkouaskej tlemach tlen nion xnoneki. Xoujtika tokajkayauaskej niman tiktekiltiskej ken xkinamiki totlamakaualis.

⁹ Tlen okijto Pedro noijki techpaleuiya itech tlen ueyi kijtosneki ipan tonemilis, ken ijkuak tiktlapejpeniaj kanon tomachtiskej noso titekiskej. Se neskayotl, akin telpokamej melak kinchiualtiaj kampa nomachtiaj makalakikan ipan universidad. Kintlaneltokiltiaj ika nomachtiskej ipan yejon kaltlamachtiltin kinkauilis makipiyakan se ueyi tekitt kampa kitlaniskej miyek tomin. Niman kemantika kimititaj amamej kampa nesi ika miyek kitlanij akin onomachtijkej ipan universidad niman ika akin xompa onomachtijkej xijkon kitlanij. Nochi yejuin uelis kinyoltlanas telpokamej, akin noneki kitlapejpeniskej tlenon kichiusaskej niman tlen sakin xok uelis kipatlaskej ipan innemilis. ¿Tlenon noneki kilnamikiskej yejuamej niman noijki intajuan?

¹⁰ Sekimej kanaj kineltokaj ika, pampa yejuin itlaj tlen san yejuamej kinnamiki kitlapejpeniskej, uelis kitlapejpeniskej kichiusaskej tlen yejuamej kinekiskej tla intlamachilis kinkauilia. Kanaj kilnamikij tlen Pablo okimijli itech tlakuajli akin chantiyaj Corinto: “¿Tlika xuelis nikchiusas on tlen nikneki san ipampa itlamachilis okse tlakatli?” (1 Cor. 10:29). Melauak, tikpiyaj tlamakaualistli ika tiktlapejpeniskej itech tlenon tomachtiskej niman itech tlenon titekiskej. Maski ijkon, kipiya tikilnamikiskej ika san itech seki tlemach tikpiyaj tlamakaualistli niman ika tlen tiktlapejpeniskej kichiusas matikixnamikikan tlen kuajli noso tlen xkuajli. Itech yejuin, tikasikamatij tleka Pablo okijto: “Se tlamakajtli para kichiusas san tlen yejua kinekis, pero xnochi kuajli on tlajtlamach. Se tlamakajtli para kichiusas san tlen yejua kinekis, pero xnochi on tlajtlamach ueli teiskaltia ipan tla-

10. ¿Tlenon noneki tikilnamiktoskej ijkuak tiktlapejpeniskej itlaj tlen san tejuamej technamiki matiktlapejpenikan?



¿Kenon tiktekitiltitokej tlamakaualistli tlen tikpiyaj?
 ¿Tijkuij niman ijkon tiktekichiuiliskej Jehová noso ika tikchiusaskej tlen tejuamej tiknekij?
 (Xkita párrafos 8-10).

neltoktli” (1 Cor. 10:23). Yejuin kuajli tech-asikamachiltia ika, tlen tejuamej tikuelitaj xyejon tlen itech noneki toyekanaskej ijkuak tiktlapejpeniskej tlenon tikchiusaskej.

KUAJLI TIKTEKITILTIAJ TOTLAMAKAUALIS IJKUAK TIKTEKICHIUILIAJ JEHOVÁ

¹¹ Ijkuak Pedro otechmelajkaijli ika maka matiktekitiltikan totlamakaualis ken xkinamiki, noijki okijto ika kuajli tiktekitiltiaj tla tochiuaj “ken itlakoualuan Dios”. Ika yejon, Jehová yotechmakak tlamakaualistli itech tlajtlakojli niman mikilistli itechkopa Jesús niman ijkon matiktekitiltikan nochi tonemilis ipan itekiyo.

¹² ¿Tlenon techkauilis kuajli matiktekitiltikan totlamakaualis niman maka oksejpa tochiuaskej tlakeualtin itech iileuilisuan niman tlen melak kineki yejuin tlaltipaktli? Chikauak titekititoskej ipan tlen technautia toTajtsin (Gál. 5:16). Matikitakan tlen ipan onochiuj Noé niman ichanejkauan. Maski chantiyaj ipan se tlaltipak-

tli kampa tentoya ika aulnemilistli niman tlausisokilistli, xonokauilijkej makinyoltilana ileuilstin niman tlen kitejtemouayaj oksekimej. ¿Kenon ouel okichiujkej? Nochipa tikititoyaj ipan tlen Jehová okinnauatijka: kichijchiusaskej se akajli, kisentlaliskej tla-kuajli tlen yejuamej niman yolcamej kikuas-kiaj, niman kimijliskiaj tlaltipakchanejkej ika itlamiskia itonaluan yejon tlaltipaktli. Biblia techijlia: “Noé okichiuj nochi tlen to-Tajtsin yokinauatijka. Niman okichiuj ijkon ken okinauatijkej” (Gén. 6:22). Yejuin okichiuj ika Noé niman ichanejkauan mamakisakan (Heb. 11:7).

¹³ ¿Tlenon yotechnauatij Jehová? Akin tiktokaj Jesús kuajli tikmatij ika yotechnauatij matitenojnotsakan (**xpoua Lucas 4:18, 19**). Ipan tonaltin tlen aman tinemij, Satanás yokimixtlapacho miyekej tlaltipakchanejkej niman nemij ken tlakeualtin itech xmelaauak tlaneltokijli, itech ken notekitiltia tomin niman itech ken miyekej noyekanaj (2 Cor. 4:4). Se tlateochialistli tiktokaskej ineskayo Jesús niman tikipaleuiskej oksekimej noijki makixmatikan niman makitekichiuilikan

11. ¿Tleka Jehová otechmakak tlamakaualistli?

12. ¿Tlen neskayotl otechmakekej Noé niman ichanejkauan?

13. ¿Tlenon yotechnauatij Jehová?

Jehová, toTajtsin itech tlamakaualistli (Mat. 28:19, 20, *TNM*). Yejuin se tekittl tlen ouijtika, niman onka miyek tlaueitlin. Ipan seki países, taltikpakchanejkej melak xkinekij itlaj kimatisej niman kemantika hasta kulanij. Tlen noneki totlajtoltisej yejua tla tiueliskiaj tiktikitiltisej totlamakaualis niman ijkon chikauak titekitiskej ipampa iTekiuajyo toTajtsin.

¹⁴ Melak techyolchikaua tiktisaskej ika melak miyekej itekipanojkauan Jehová yokitejtemojkej nemisekej san ika tlen melak noneki niman ijkon tikitisej ken precursores, yejumej kasikamatij ika tinemij sa itlamiyan yejuin tonaltin (1 Cor. 9:19, 23). Sekimej tlapaleuiyaj ipan intlanechikol, niman okseki-mej yauej kampa nonekij tenojnotsej. Tikitaj ika ipan makuijli xiujtin tlen yopanokej, ipantsin 250,000 toknuiyan yonochiujkej precursores. Aman nemij ipantsin 1,100,000. ;Melak kualtsin ika miyekej kuajli kitekitiltiaj tlamakaualistli niman ijkon kitekichiuilisej Jehová! (Sal. 110:3).

¹⁵ ¿Tlenon yokinpaleui yejuin toknuiyan ijkon makichiuakan? Matikitakan tlenon inpan onochiuj John niman Judith. Itech 30 xiujtin tlen yopanok, yotlapaleuijkej ipan miyek países. Kilnamikij ika, ijkuak opeuj Tlamachtijli tlen kiselia se Precursor, ipan 1977, kinyolchikauayaj toknuiyan mauian kampa nonekiyaj tenojnotsej. John kijtousa ika ononek miyekpa kipatlas itekiyo niman ijkon uelis nemis san ika tlen yemelak noneki niman kichiuas tlen yokinemilijka. Sakin, otenojnotsatoj okse país. Ompa okitakej ika tikchiuilis teoyotl Jehová niman itech titlaneltokas kinpaleuiya makipanauikan tlen ouijtika, mauelikan okse tlahtojli noso nomatiskej nemisekej oksekan niman kixikoskej kampa sua noso tona. ¿Tlenon kinemilijaj pampa yokitekichiuijkej Jehová nochi yelon xiujtin? John kijtousa: “Nikmachilia ika

14, 15. ¿Tlenon yokitlapajpenijkej kichiuaskej miyekej itekipanojkauan Jehová? (Xkita tlaixkopinaltin kampa peua tlen tomachtijtokej).

nitekikitika ipan tlen melak kuajli tekittl itech nochi tlen yonikixmat. Nikita Jehová ken akin yemelak nemi, ijkon ken se tajtli akin teltasojtlani. Aman kuajli nikasikamati tlenon kijtosneki Santiago 4:8, tlen kijtousa: ‘Xnisiuikan Dios niman yejua mechnisiuis’. Nikmatstoya ika yoniknextijka tlen niktejtemo-uaya: nipakis niman nikmatis tleka ninemi”.

¹⁶ Ipampa tlen panoua ipan innemilis, seki-mej toknuiyan san seki xiujtin uelij chikauak kitekichiuilij Jehová. San ika, miyekej ontlapaleuiyaj kampa nochijchiuaj kaltin kampa noueyichiuas Jehová nochiuian ipan taltikpaktli. Se neskayotl, kanaj 27,000 toknuiyan otlapaleuijkej ijkuak onochijchiuj oficina kampa noyekana nochi sucursales, ipan Warwick (Nueva York). Sekimej otlapaleuijkej ompa ome semanas, oksekimej miyek metstin niman sekimej se xiuitl noso hasta okipanauijkej se xiuitl. Miyekej itech yejumej, uelis tikijtoskej kentla okiteltijkej tlen kichiuayaj ipan innemilis. Nochimej okite-makakej se kualtsin neskayotl itech kenon kuajli tiktikitiltisej tlamakaualistli tlen yotechmakak Jehová niman ijkon tikmakaskej ueyilistli niman tikueyichiuaskej.

¹⁷ Melak tiktlasojkamachiliaj Jehová pampa yotikixmatkej niman ipampa tlamakaualistli tlen tikpiyaj ijkuak tikueyichiuaj. Nochi tlen tiktlapajpenisej tikchiuaskej, makiteititi ika tikpatiojkaitaj yejon tlamakaualistli. Maka san tikpopoloskej noso tiktikitiltisej ken xkinamiki, matijkuikan ika tiktetekichiuilisej toTajtsin nochi kech tiuelisej. Tla ijkon tikchiuaj, uelis kuajli tikmatstoskej ika tikselsej tlateochiualistin tlen yejua yokijto ika yejuin tlahtoltin: “Tlen onochijchiuj noijki makisaskej itech tlen teijtlako niman kipiysaskej kualtsin makixtilistli ken ikoneuan toTajtsin” (Rom. 8:21, *TNM*).

16. ¿Kenon melak miyekej toknuiyan yokitekiltitijkej tlamakaualistli tlen kipiayaj?

17. ¿Tlenon melak kualtsin kipiysaskej akin aman kuajli kitekitiltiaj tlamakaualistli tlen techmaka toTajtsin?

TLAYEKANKEJ NIMAN TLAPALEUIJKEJ XKIXKOPINAKAN TIMOTEO

ITECH xiuittl tlen yopanok, nochiuiyan ipan tlaltikpaktli melak miyekej iteixpantijkauan Jehovah okinmakakej tekitl ken tlayekankej niman tlapaleuijkej ipan tlanechikojli. Tla tejua otikseli yejuin tekitl, tokniuj akin timistlasojtlay, kuajli tikmatstokej ika tiyol-paki ipan yejuin yenkuik tekitl.

San ika, kanaj noijki achijtsin timomojtia, niman tikasikamatij. Jason, se tokniuj tlayekanketl akin san telpochtli, kijtousa: “Ijkuak san kemach onechmakakej yejuin tekitl, onikmachili ika xueliskia nikchiuas”. Moisés niman Jeremías noijki okimachilijkej ika xueliskiaj kichiuaskej tlen Jehovah okinnauatijka (Éx. 4:10; Jer. 1:6). ¿Ijkon timomachilia? ¿Tlenon mitspaleuis maka ijkon xmomachili niman noijki xyektlalijtiuj ken tikchiua motekiyo? Matikitakan ines-kayo Timoteo (Hech. 16:1-3).

XCHUIA IJCON KEN OKICHIUJ TIMOTEO

Timoteo kipiaya kanaj 20 xiuittl ijkuak Pablo, itlatitlankauj Cristo, okinots iuan mauia kampa yejua ontenojnotsaskia. Kanaj Timoteo xtlaneltokaya itech niman kanaj okpa kinemiliaya kichiuas yejuin yenkuik tekitl tlen yokimakakaj (1 Tim. 4: 11, 12; 2 Tim. 1:1, 2, 7). San ika, ijkuak yopanoka majtlaktli xiuittl, Pablo ouel okijli tlanechikojli tlen onkatka Filipos: “Tla to-Teko Jesús kineki, saniman niktitlanis Timoteo para mechontas [...]. Xnikpia okse yejuan no ijki kinemilia ken nejua” (Filip. 2: 19, 20).

¿Tlenon okipaleui Timoteo manochiua se kuajli tlayekanketl? Matikitakan chikua-sen tlen yejua okichiu, tlen tejua noijki uelis tikchiuas.

1. Yemelak najmanaya inpampa okse-kimej. Pablo okimijli tokniuan akin nemi-yaj Filipos ika Timoteo yemelak najmanaya inpampa (Filip. 2:20). Kema, Timoteo naj-


manaya inpampa tlaltikpakchanejkej. Yejua melak kinekiya ika manonisiukan itech Jehovah, niman ika iyojlo okikauj tlen yejua kinekiya niman ijkon kinpaleuis.

Maka xchiua ijkon ken se akin kinejne-miltia autobús, akin melak kajmana sa-niman ajsis kampa notelketsaj autobuses xijkon ken kintlejkontis akin kinuikas. Wil-liam, se tokniuj akin kitlakaitaj niman kuajli yotekit 20 xiuittl ken tlayekanketl, ki-mijlia akin kemach okinmakakej se tekitl: “Xkintlasojtla tokniuan. Xkita tlenon kin-poloua niman maka san xkita kenon tikye-kanas tlanechikojli”.

2. Kachtopa okitejtemo tenojnotsas.

Ijkuak kijtotoya kenon Timoteo xijkon katka ken oksekimej, Pablo okijto: “Oksekimej kitejtemouaj nochi tlen kuajli san para yejuamej, niman xejua on yejuan para Cristo Jesús” (Filip. 2:21). Pablo nemiya Roma ijkuak okijkuilo yejuin tlajtoltin. Yejua okitak ika tokniuan melak tekititoyaj ipan tlen yejuamej kitejtemouayaj. Uelis tikijtoskej ika yejuamej kichiuayaj san tlen xkinteki-yomakaya ijkuak kitekichiuliayaj toTajtsin. ¿San ika, Timoteo xijkon kichiuaya! Ijkuak kitaya uelis kichiuas okseki ipan tenojnotsalistli, yejua tlanemiliaya ijkon ken Isaías, akin okijto: “¡Nikan ninemi! ¡Nejua xnech-titlani!” (Is. 6:8).

¿Tlenon mitspaleuis xchiua motekiyo ni-man noijki itekiyo toTajtsin? Kachtopa, xkita katlejua noneki kachtopa manochi-ua. Pablo okijto ika melak noneki matik-matikan katlejua tlemach “on tlen más kuajli” (Filip. 1:10). Kuajli xkita ika yejon tlen ueyi kijtosneki ixpan toTajtsin noijki yejon tlen maueyi makijtosneki ipan mo-nemilis. Ika ome, xnemi san ika tlen none-ki. Maka xchiua tlen mitskulia tiempo ni-man kichiuas xsiaui. Pablo okijli Timoteo: “Xtlalkaui ineleuilis on telpokamej. Tejua



1



2



3



xtoka on tlen melajki. Xpia tlaneltoktli, teltajsojtlalistli niman yolseuilstli” (2 Tim. 2: 22).

3. Chikauak okitekichiuii Jehová. Pablo okintlalnamiiki filipenses: “Nemejua-mej nenkimatstokej ken ijki Timoteo kiteititia ikuajlilis. Nenkimatstokej ken ijki tekipanoua nouan ipan on kuajli tlajtojli yejua kitemaka temakixtilistli ken se konetl yejuan kipaleuiya itaj” (Filip. 2:22). Timoteo xtlatsijki katka. Yejua niman Pablo chikauak san sekan otekitkej, niman yejuin okichiuji melak kuajli manouikakan.

Onka miyek tekitl ipan ikalpan toTajtsin. Yejuin tekitl melak mitsyolpaktis niman kichiuas xkinnisiui tokniuian. Yejua ika, xtejtemo nochipa chikauak titekkitos ipan “itekiu toTeko” (1 Cor. 15:58).

4. Okichiuji tlen kimachtiyaj. Pablo okitlajkuilouli Timoteo: “Tejua kuajli tikmatstikaj notemachtli ken ijki ninoyekana, on tlinon nikneki nikchihuas, notlaneltok, noijyouilis, noteltajsojtlalis, tlinon nejua nixkikoua” (2 Tim. 3:10, 11). Pampa Timoteo kichiuaya tlen kimachtiyaj, ouel okimakakej okseki tekitl (1 Cor. 4:17).

¿Nemi yakaj akin iuan timouika, akin iueyi niman tlamachilise akin uelis tikixkopinas? Tla ka, ¿tleka xtiktejtemoua se? Tom, se tokniuaj akin youejkauj ken tlayekanketl, kijtous: “Se tokniuaj tlayekanketl akin tlamachilise melak onajman nopampa niman miyek onechmachtli. Nejua miyekpa itlaj niktajtoltiaya niman nochipa nikchiuaya tlen nechijliaya. Yejuin onechpaleui manitlaneltoka notech”.

5. Sa no yejua nomachtijtiaya. Pablo okijli Timoteo: “Xmomachtli sanoyej para kuajli timouikas itechika Dios ikan yolchipualistli” (1 Tim. 4:7). Akin kichiuaja ejercicio uelis kipiya akin kijlijtiuj tlenon noneki makichiuaja, san ika, noijki noneki sa no yejua nomachtijtias. Pablo okiyolchikauj Timoteo: “Nochipa xmomachtijto tejua titlapouas teixpan, titeyolchikauas, titemachtis. Xtlanemili itech yejuin tlemach; itech yejuin xmosentemaka, niman ijkon

nochimej kitaskej ika tiueyixtiuj” (1 Tim. 4: 13-15, *TNM*).

Tejua noijki uelis tikyektlatijtiyas tlen itiueli tikchiua. Maka xkauili ika motlaneltokil manoteltlali. Xmochikaua nochipa timomachtis tlen san kemach yokikixti ikalpan toTajtsin itech kenon noneki nochiuas tekitl. Xmotlajpiya maka melak titlaneltokas motech. Maka xnemili ika pampa miyek yotikixmat uelis itech itlaj titlapaleuis mas-ki nion xotimomachtli itech yejon. Ijkon ken Timoteo, “kuajli xmixtlalo niman kuajli xkita on tlen tiktemachtia” (1 Tim. 4:16).

6. Otlaneltokak itech itlayekanalís iespíritu santo Jehová. Ijkuak tlajtotoya itech itenojnotsalis Timoteo, Pablo okijli: “Xkejyeua yejuin tlen omitsmaktilijkej niman melak tlasojti itechkopa espíritu santo, tlen topan onka” (2 Tim. 1:14, *TNM*). Tla kinekiya kejyeuas noso kitlajpiyas itenojnotsalis, Timoteo nonekiya tlaneltokas itech itlayekanalís espíritu santo.

Donald, se tokniuaj akin youejkauj miyek xiujtin ken tlayekanketl, kijtous: “Tokniuian tlayekankej niman tlapaleuijkej noneki makipatiojkaitakan ken nouikaj iuan toTajtsin. Akin kichiuaj yejon, kipiyaaskej chikualistli. Tla kitlajtlanij espíritu santo niman kiskaltiaj itlakilyo, imikniuian yemelak kimistaskej ken se tlateochiualistli” (Sal. 84:7; 1 Ped. 4:11).

XPATIOJKAITA MOTEKIYO

Melak kualtsin tikitas ika miyekej tokniuian akin kemach yokinmakakej tekitl ken tlayekankej niman tlapaleuijkej, ijkon ken tejua, kiueyilijtokej ken kitekichiuiiaj Jehová. Jason, akin otikteneujkej ijkuak otipeujkej, kijtous: “Itech kech nikuika ken tlayekanketl, melak miyek yoniuel niman aman nikmachilia ika niueli nikchiua. Melak nechyolpaktia nikpiyas yejuin tekitl niman nikita kentla se ueyi tlateochiualistli”.

¿Tikueyilijtiyas ken tiktekichiuiia Jehová? Xmokojtli tikchiuas ken okichiuji Timoteo. Ijkon, tejua noijki timochiuas se tlateochiualistli ipan ikalpan Jehová.

4



5



6





Matikixkopinakan Jehová, toTajtsin akin teyolchikaua

“Ma tikyekteneuakan toTajtsin Dios yejuan [...] techyoltlalia [noso techyolchikaua] ipan nochi on tlin techpajsoloua”

(2 COR. 1:3, 4).

IJKUAK tlaltikpakchanejkej otlahtlakojkej, Jehová okiteititi ika yejua toTajtsin akin teyolchikaua. Maski san kemach okixnamijkej ipan Edén, yejua okijto se teotlajtojli tlen, ijkuak nasikamatiskia, kinyolchikauaskia inkoneuan Adán niman kinmakaskia se tlama-chialistli. Tiknextiaj yejuin teotlajtojli ipan Génesis 3:15 niman kij-toua ika yejkos tonajli ijkuak kipopoloskej Satanás niman nochi tlen xkuajli kichiua (1 Juan 3:8; Apoc. 12:9).

JEHOVÁ OKINYOLCHIKAUJ AKIN YEUEJKAUI OKITEKICHIUILIJEJ

² Noé onen ipan tonaltin ijkuak tlaltikpakchanejkej xkinekiyaj kinisiuiskej toTajtsin, niman san yejua niman ichanejkauan kiueyichiuayaj Jehová. Kanaj Noé onajman pampa nochiuiyan kitaya ika tlauisokiyaj niman auilnemiyaj (Gén. 6:4, 5, 11; Jud. 6). San ika, Jehová okimakak kojtilistli tlen ika ueliskia yolmelaujkanemis (Gén. 6:9). Okijli ika kipopoloskia yejon tlaltikpaktli tlen

1. ¿Kenon Jehová okinyolchikauj niman okinmakak tlamachialistli tlaltikpakchanejkej sakín ika okixnamijkej ipan Edén?

2. ¿Kenon Jehová okiyolchikauj Noé?

TLAKUIKALTIN: 7, 3

¿KENON TITLANANKILISKIA?

¿Kenon yokiteititi Jehová ika yejua toTajtsin akin teyolchikaua?

¿Kenon Jesús okinyolchikauj oksekimej?

¿Kenon inomachtijkauan Cristo okinyolchikaujkej imik-niuan?

xkuajli katka niman okijli tlenon kichiuas niman ijkon makisaskej ichanejkauan (Gén. 6: 13-18). Yejon kanaj melak okiyolchikauj.

³ Seki xiujtin sakín, Josué okimakakej se ueyi tekítl: kinyekanas israelitas niman ijkon manochantikan ipan Tlajli tlen yokimijlikaj kinmakaskiaj. Yejuin kijosnekiya kimixnamikiskej kojtikey kalpamej tlen onkatkaj ipan yejon tlajli. Jehová kimatstoya ika nochi yejuin ueliskia kajmanas Josué. Ika yejon, okinauati Moisés makiyolseui. Okijli: “Xmaktili tekítl Josué niman xyolchikaua, pampa yejua akin kipanauis iyekapan yejuin kalpan niman yejua akin kichiuas makiselikan tlajli tlen tejuua tikitas” (Deut. 3:28). Niman hasta Jehová noijki okiyolchikauj Josué ika yejuin tlajtoltin: “¿Xnejua yonimitsnauati? Xpiya yolchikaualistli niman kojtilistli. Maka xmojkamiki noso xmomojti, pampa Jehová moTajtsin mouan nemi maski san kanon tias” (Jos. 1:1, 9).

⁴ Jehová xokinyolchikauj san seki itekipanojkauan, noijki okiyolchikauj nochi ikalpan. Se neskayotl, pampa kimatiya ika kalpan judío nonekiskia makiyolchikauakan ijkuak kuikaskiaj Babilonia, okijli yejuin tlajtoltin: “Maka xmomojti, pampa mouan ninemi. Maka xmojkamiki, pampa nejua nimoTajtsin. Nejua nimitsyolchikauas, kema, nejua nimitspaleuis. Nejua yemelak kuajli nimitskiskijos ika nomayekma tlen melajki” (Is. 41:10). Akin kichiuayaj ken Cristo ipan kachtopa siglo noijki kuajli kimatstoyaj yejon, niman aman tejuamej noijki kuajli tikmatstokey (**xpoua 2 Corintios 1:3, 4**).

⁵ Jehová noijki okiyolchikauj ikoneuj, Jesús. Ijkuak Jesús onoapolakti, okikak se tlajtojli tlen ualeuaya iluikak niman kijtouaya: “Yejua in yejua notlajsojkaKonetsin yejuan itech nipaktikaj” (Mat. 3:17). Uelis tikmats-

toskej ika yejuin tlajtoltin okiyolchikauj ijkuak tenojnotstinemiya.

INESKAYO JESÚS

⁶ Jesús okixkopin ineskayo itaj. Ipan neskayotl tlen tlajtoua itech talentos, okinyolchikauj inomachtijkauan nochipa makitekichiuilijtukan Jehová ika melajkayotl. Itech tlen okijto ipan neskayotl, yejon tlakatl okintlakaitak intlakeualuan akin yolmelaujkej katkaj ijkuak okimijli: “¿Sanoyej kuajli! Tejuua tikuajli tekítketl, niman otikchiu ken oniknek. Aman ika xomitsixkajkayau on achijtsin, más miyek nimitsmaktilis. [...] Niman nouan xpaki” (Mat. 25:21, 23).

⁷ Jesús nochipa kinyolchikauaya itlatitlankauan, maski ijkuak kichiuayaj tlen xkuelitaya. Xtlanemili itech yejuin, yejuamej miyekpa nokualaniayaj pampa kimatisnekiyaj akinon ueyixtoya intech yejuamej. San ika, Jesús ika ijyouilistli kintlalnamiiktiaya ika nonekiya yolyemankej yeskej niman kichiuaskej ken akin tetekichiuiiaj, niman xken akin tlanauatiaj (Luc. 22:24-26). Pedro miyekpa okichiuaj tlen Jesús xkuelitaya (Mat. 16:21-23; 26:31-35, 75). Maski ijkon, Jesús xokikauj. Ka, yejua okiyolchikauj niman hasta okinauati makinyolchikaua imiknauan (Juan 21:16).

INNESKAYO YEUEJKAUI ITEKIPANOJKAUAN TOTAJTSIN

⁸ Achto ika Jesús uajlaskia ipan tlaltikpaktli niman kitemakas se melak kuajli neskayotl, itekipanojkauan toTajtsin ikasikamatiyaj ika melak nonekiya kinyolchikauaskej oksekimej. Matikitakan tlenon okichiuaj tekiuaj Ezequías. Ijkuak asirios kinekiyaj kixnamikiskej Judá, Ezequías okinsentlali tlayekankej itech akin

6. ¿Itech tlenon techyolchikaua neskayotl tlen tlajtoua itech talentos?

7. a) ¿Kenon Jesús kinyolchikauaya itlatitlankauan? b) ¿Kenon Jesús okiyolchikauj Pedro?

8. ¿Kenon Ezequías okinyolchikauj akin kinyekanajtlaixnamijkej niman kalpan Judá?

3. ¿Kenon Jehová okiyolchikauj Josué? (Xkita tlaixkopinajli kampa peua tlen tomachtijtokej).

4, 5. a) ¿Kenon yeuejkauí Jehová okiyolchikauj ikalpan? b) ¿Kenon Jehová okiyolchikauj ikoneuj?

tlaixnamikij niman nochi kalpan, niman okimijli seki tlajtoltn tlen okinyolchikauj (**xpo-ua 2 Crónicas 32:6-8**).*

⁹ Matitlajtokeran aman itech tlen ipan onochiuj Job. Yeyua melak najmanaya, san ika, akin okiyolchikauatoj onochiujkej tlakamej akin tepajsolouayaj, niman san okijlikej tlajtoltn tlen teyolkokojkej. Maski ijkon, yeyua okinmacthi kenon kinyolchikauaskej oksekimej. Okimijli ika, tla yeyua nonekiskia kinyolchikauas, kimijliskia tlajtoltn tlen teyolchikauaj niman tlen kichiuaskia kuajli manomachilikan (Job 16:1-5). Sa ika tlami, Elihú niman Jehová yeyuamej akin okiyolchikaukej Job (Job 33:24, 25; 36:1, 11; 42:7, 10).

¹⁰ Ichpoch Jefté noijki ononek makiyolchikauakan. Jefté kominixnamikiskia ammonitas. Yeyua okijto ika tla Jehová kipaleuiaya matetlani, kitemakaskia akin kachtopa kuajnamikiskia sakín ika ontlaixnamikiskia niman ijkon makitekichiuii Jehová ipan tabernáculo. Aman tej, ichpoch Jefté yeyua akin kachtopa okinamikito ika pakilistli pampa otetlanka. Jefté melak onajman, pampa xkinpiaya okseki ikoneuan. Maski ijkon, okichiuaj tlen okijto niman okititlan ichpoch kampa Siló niman ijkon ompa matekiti nochi inemilis ipan tabernáculo (Juec. 11:30-35).

¹¹ Yeyon ouijtika okitak Jefté, san ika, ka-

* 2 Crónicas 32:6-8: “Kuakon yeyua okintlali tlayekankej itech akin tlaixnamikij ipan kalpan, niman okinsentlali-kej nochimej ipan plaza itech ipuerta kalpan niman okinyolchikauaj, okimijli: ‘Xmoyolchikauakan niman xpiyakan kojtilistli. Maka xtlamakasikan nion xmojkamikikan ipampa tekiuaj itech Asiria nion inpampa miyekej akin iuan nemij, pampa melak miyekej akin touan nemij xijkon ken akin iuan yeyua nemij. Iuan yeyua nemi se manakatli, san ika, touan nemi Jehová, toTajtsin akin techpaleuis niman tlaixnamikis topampa’. Niman nochi kalpan okiyolchikauj itlajtoluan Ezequías, akin tekiuaj itech Judá”.

9. ¿Tlenon techmacthia amoxthi Job itech tiktemakas yolseuilistli?

10, 11. a) ¿Tleka nonekiya makiyolseuikan niman makiyolchikauakan ichpoch Jefté? b) ¿Akinomej noijki kinnamiki matikimijlikan ika kuajli tlen kichiuaj niman matikinyolchikauakan aman?

naj ichpoch yeyua akin melak ouijtika okitak yeyuin. Maski ijkon, yeyua okinek kichiuas tlen itaj yokijtoka (Juec. 11:36, 37). Yeyuin okijtosnek ika xkeman ueliskia nonamiktis nion kinpiyas ikoneuan. Xok kinpiyaskiaj inchanejkauan niman xok kimilnamikiskiaj. Kema, yemelak nonekiya makiyolseuikan niman makiyolchikauakan. Biblia techijlia: “Niman onomatkej kichiuaj yeyuin ipan Israel: Sejse xiuitl, ichpokamej itech Israel yayaj konyolchikauayaj ichpoch Jefté akin galaadita, nauí tonajli ipan se xiuitl” (Juec. 11:39, 40). Ipan yeyuin tonajli, akin kichiuaj ken Cristo niman xnonamiktiaj niman nokojtiliaj miyek kichiuaskej ipan itekiyo toTajtsin kinnamiki noijki matikimijlikan ika kuajli tlen kichiuaj niman matikinyolchikauakan (1 Cor. 7:32-35).

INNESKAYO ITLATITLANKAUAN CRISTO

¹² Ipan yeuajli ijkuak imikiskia, Jesús okijli itlatitlankauj Pedro: “Simón, Simón, xkaki. Nemoka yotlajtlan Satanás para mechtsejtse-los ken itlaj trigo, pero nejua moka yoniktlatlantan itech Dios para ma ka tikpolos motlaneltok. Niman ijkuak tejua yotimoyolkuep, xkimpaleui moknuijan para ma melajkanemikan” (Luc. 22:31, 32).

¹³ Pedro katka se akin kinyekanaya toknuijan ipan tlanechikojli tlen onkatka ipan kachtopa siglo (Gál. 2:9). Yolchikaualistli tlen okiteititi ipan Pentecostés niman ipan okseki tonaltin melak okinyolchikauaj imiknuijan. Sakín ika yokitekichiuii toTajtsin miyek xiuitl, okintlajkuilouili niman ijin okimijli: “Itechkopa Silvano, akin nikita ken se toknuij yolmelaujki, yonimechtlajkuilouili ika achijtsin tlajtoltn tlen ika nimechylchikauas niman ika nochi noyojlo nimechijlis ika yeyuin tlen melauak iueyiteiknelilis toTajtsin. Xmelajkanentokan itech yeyuin” (1 Ped. 5:12, TNM). Itech miyek xiujtin, iamatlajkuilouian Pedro melak yokinyolchikauaj miyekej

12, 13. ¿Kenon Pedro okinyolchikauaj toknuijan?



Iamatlajkuiloluan itlatitlankauan Cristo melak okinyolchikauj tlanechikoltin ipan kachtopa siglo, niman noijki techyolchikauaj aman.

(Xkita párrafos 12-17).

akin kichiuaj ken Cristo. Niman aman, ijkuak tikchiaj manochiua tlen Jehová okijto techmakas, melak techpoloua yejon yolchikaua-listli (2 Ped. 3:13).

¹⁴ Okse akin okinyekan toknluan ipan tlanechikojli ipan kachtopa siglo yejua apóstol Juan. Nochi tlen okijkuilo itech ken otenojnots Jesús yokinyolchikauj itech miyek xiujtin akin kichiuaj ken Cristo niman ok techyolchikaua. Se neskayotl, evangelio tlen yejua okijkuilo san ompa ijkuiliujtika ika Jesús okijto ika tlasojtlalistli se kualneskayotl tlen kinneskayotiskia akin yemelak inomach-tijkauan (**xpoua Juan 13:34, 35**).

¹⁵ Yeyi amatlajkuiloltin tlen okimijkuilo kuajkui tlamachtiltin tlen melak techpaleui-yaj. Se neskayotl, ijkuak tikmachiliaj ika xtlaj ika titepaleuiyaj pampa miyek ken otopopolojkej, xmelak ika techyolseuiya tikmatiskej ika iyesyo tlen topampa okitemakak Je-

14, 15. ¿Tleka itech miyek xiujtin amatlajkuiloltin tlen okimijkuilo apóstol Juan yokinyolchikauj akin kichiuaj ken Cristo?

sús “techchipauilia nochi totlajtlakoluan”? (1 Juan 1:7). Niman tla toyojlo nochipa tech-tlajtlakolmakatika, xmelak ika ajsi ipan toyojlo tikmatiskej ika “Dios más nochi kimati xken toyojlo”? (1 Juan 3:19, 20). Juan san yejua akin okijkuilo ika “Dios yejua tetlajsoj-tlalistli” (1 Juan 4:8, 16). Niman ipan ika ome niman ika yeyi iamatlajkuilol kimijlia ika kuajli kichiuaj toknluan akin “kitlakamatij on temachtijli yejuan melauak” (2 Juan 4; 3 Juan 3, 4).

¹⁶ Apóstol akin miyek okichiuj niman ijkon kinyolchikauas imiknluan kanaj katka Pablo. Nesi, ika ijkuak opeuj notekichiulia Cristo, miyekej apóstoles onokaujkej Jerusa-lén, kampa nemiya grupo akin tlayekana-ya ipan nochi tlanechikoltin (Hech. 8:14; 15:2). Akin kichiuayaj ken Cristo ipan Judea kinnojnotsayaj itech Cristo taltikpakchanej-kej akin, ipampa tlen kineltokayaj judíos, tlaneltokayaj san itech se inTajtsin. San ika,

16, 17. ¿Kenon apóstol Pablo okinyolchikauj akin kichiuayaj ken Cristo ipan kachtopa siglo?

espíritu santo okititlan apóstol Pablo makin-nojnotsati griegos niman romanos, akin kin-ueyichiuyaj miyek tajtsitsintin (Gál. 2:7-9; 1 Tim. 2:7).

¹⁷ Pablo okistinen ipan nochi kech ueyi niman patlauak tlen aman itoka Turquía, niman noiiki ipan Grecia niman Italia, niman okinchijchiuj tlanechikoltin kampa nemiyaj akin xjudíos katkaj. Akin kemach yopeujkaj kichiuyaj ken Cristo niman chantiyaj ipan yejon ueyi kalpamej nonekiya makinyolchikauakan pampa san no inchanejkauan kintla-ueltokayaj (1 Tes. 2:14). Ipan amatlajkuilojli tlen okimijkuilouili yenkuik tlanechikojli tlen onkatka Tesalónica, kanaj ipan xiuitl 50, Pablo okimijli: “Nochipa tikmakaj tlaxtlauijli Dios para nochimej nemejuamej, niman nochipa temechelnamikij ikan tooración. Temechelnamikij ixpan Dios toTajtsin ken ijki ipampa nemotlaneltok nenkichiuj miyek tekitl, niman ken ijki ipampa nemotetlajsojtlalis nenkitekipanouaj, niman ken ijki ipampa nemotlamachalis itech toTeko Jesucristo nenmelajkanemij” (1 Tes. 1:2, 3). Noiiki, okinnauati yejuin: “Xmoyoleuakan se iuan okse, niman xmoyolchikauakan ikan tlaneltoktli iuan oksekimej” (1 Tes. 5:11).

INESKAYO GRUPO AKIN TLAYEKANA IPAN NOCHI TLANECHIKOLTIN

¹⁸ Ipan kachtopa siglo, Jehová okitekitilti grupo akin tlayekanaya ipan nochi tlanechikoltin makinyolchikaua nochimej akin kichiuyaj ken Cristo, niman noiiki toknluan akin kinyekanayaj tlanechikoltin. Ijkuak Felipe okinnojnots samaritanos itech Cristo, toknluan itech grupo akin tlayekanaya ipan nochi tlanechikoltin okipaleuijkej Felipe ipan tlen kichiuyaj. Kema, ompa okintitlankej omemej tlakamej akin teuan nemiyaj ipan grupo, Pedro niman Juan, niman ijkon yejuamej makitlajtlanilijan Jehová ika akin kemach yopeujkaj kichiuj ken Cristo makiselij-

18. ¿Kenon grupo akin tlayekanaya ipan nochi tlanechikoltin okiyolchikauj Felipe?

kan espíritu santo (Hech. 8:5, 14-17). Kuajli tikmatstokey ika yejuin melak okiyolchikauj Felipe niman noiiki nochimej akin kemach yopeujkaj kichiuyaj ken Cristo.

¹⁹ Sakin, okitlajoltijkej grupo akin tlayekanaya ipan nochi tlanechikoltin tla akin kichiuyaj ken Cristo san ika xjudíos katkaj nonekiya manochiuilikan circuncisión, ijkon ken kijtouaya tlanauatijli tlen okinmakakaj judíos itechkopa Moisés (Hech. 15: 1, 2). Akin tekitiyaj ipan grupo akin tlayekanaya ipan nochi tlanechikoltin okitlajtlanilijkej toTajtsin iespíritu santo, otlanemilijkej itech tlen kijtouaya iTlajtol toTajtsin niman okijtokey ika xok nonekiya nochiuiliskej circuncisión. Tlen okijtokey itech yejuin, okijkuilojkej ipan se carta niman okomintitlanilijkej tlanechikoltin itechkopa toknluan akin tlajtouayaj inpampa. Ijkuak akin kichiuyaj ken Cristo okipoujkej, “sanoyej opajkej ipampa on yoltlalilistli yejuan okiselijkej” (Hech. 15:27-32).

²⁰ Aman, Grupo akin Tlayekana ipan nochi tlanechikoltin itech iteixpantijkauan Jehová kinyolchikaua toknluan akin tekitij Betel, akin chikauak kitekichiuilij toTajtsin niman, noiiki nochimej toknluan ipan tlaltikpaktli. Ijkon ken ipan kachtopa siglo, tinochimej tipakij ika tikseliaj inyolchikaualis. Noiiki, Grupo akin Tlayekana ipan nochi tlanechikoltin okikixti ipan 2015 amatlajkuilojli *Xmokuropa itech Jehová* tlen kinyolchikaua tlaltikpakchanejkej ipan nochi tlaltikpaktli manokuepakan itech tlen melauak. Aman tej, ¿san toknluan akin kiyekanaj tenojnotsalistli noneki kixkopinaskej Jehová niman kinyolchikauaskej oksekimej? Tikitaskej yejuin ipan okse tlamachtijli.

19. ¿Tlenon okichiujkej akin kichiuyaj ken Cristo ijkuak okiselijkej amatlajkuilojli grupo akin tlayekanaya ipan nochi tlanechikoltin?

20. a) ¿Kenon Grupo akin Tlayekana ipan nochi tlanechikoltin kinyolchikaua aman toknluan ipan nochi tlaltikpaktli? b) ¿Tlenon tikitaskej ipan okse tlamachtijli?



Aman noneki “más ma toyoleuakan” semej iuan oksekimej

“Ma tiknemilikan ken ijki uelis tikinyoleuaskej oksekimej [...], niman más ma toyoleuakan pampa tikmatij ika ye nisiu uajlau toTeko [‘inisiuj tonajli’, TNM]” (HEB. 10:24, 25).

TLAKUIKALTIN: 90, 87

¿KENON TITLANANKILISKIA?

Ken okijto Pablo, ¿tleka akin tikchiuaj ken Cristo noneki aman “más ma toyoleuakan” semej iuan oksekimej?

¿Akinomej noneki matikin-yolchikauakan ipan yejuin tonaltin?

¿Akinomej uelis teyolchika-uaskej ipan tlanechikojli?

AMAN melak noneki matoyoleuakan noso matoyolchikauakan semej iuan oksekimej. ¿Tleka? Ipan amatlajkuilojli tlen apóstol Pablo okomintitlanili hebreos, yejua okijto: “Ma tiknemilikan ken ijki uelis tikinyoleuaskej oksekimej para ma notlajsojtlakan se iuan okse niman para ma kichiuakan on tlen kuajli. Niman ma ka no ijki ma tikchiuakan ken sekimej yejuan xok nosentlaliaj touan kampa tikmauistiliaj Dios. Yej ma titoyoleuakan se iuan okse, niman más ma toyoleuakan pampa tikmatij ika ye nisiu uajlau toTeko [‘inisiuj tonajli’, TNM]” (Heb. 10:24, 25). Panoskia makuijli xiuitl niman yejon tokniuan kitaskiaj kenon yejkoskia itonal Jehová ipan Jerusalén. Kasikamatiskiaj ika tlen Jesús okimijlika nochiujtoya niman nonekiya choloskej itech yejon kalpan (Hech. 2:19, 20, TNM; Luc. 21:20-22). Yejon tonajli oyejkok ipan xiuitl 70, ijuak romanos okipopolojkej Jerusalén ken toTajtsin yokijtoka.

² Ipan yejuin tonaltin, miyek onka tlen techititia ika iyejkotika ito-

1. ¿Tleka Pablo okimijli hebreos akin kichiuayaj ken Cristo melak manoyolchikauakan semej iuan oksekimej?
2. ¿Tleka noneki matikitstokan kenon melak toyolchikauaskej semej iuan oksekimej?

nal Jehová, tlen ueyi yes niman melak temojtis (Joel 2:11). Niman itlajtoluan Sofonías 1:14 nochiuhtokej ipan yejuin tonaltin: “¡Lueyi tonal Jehová iyej kotika! ¡Iyej kotika, niman totoka uajlauj!”. Ika yejon, Pablo techijlia: “Ma tiknemilikan ken ijki uelis tikinyoleuaskej okseki-mej para ma notlajsojtlakan se iuan okse niman para ma kichiuakan on tlen kuajli” (Heb. 10:24). Yejuin kijosneki, ika noneki tikchikaujtiasej ken tajmanaj inpampa toknluan niman ijkon tikinyolchikauaskej ijkuak nonekis.

¿AKINOMEJ NONEKI MAKINYOLCHIKAUAKAN?

³ Biblia kijtous: “Tlen kajmankamiktia iyojlo se tlakatl yejon tlen kajmana, san ika, tlen kuajli tlajtojli yejon tlen kiyolpaktia” (Prov. 12:25). Kema ijkon, maski san kemantika, tinochimej techpoloua matechijlikan tlen matechylchikaua. Pablo okiteititi ika hasta akin telyolchikauaj noijki noneki makinyolchikauakan. Akin kichiuayaj ken Cristo niman chantiyay Roma okimijkuilouili: “Sanoyej nikneki nemechitas para nemechmakas itlaj tetlayokolijli yejuan kisa itech on Espíritu Santo para xmelajkanemikan. Nikijosneki ma titoyoleuakan se iuan okse ika on tlaneltoktli yejuan tikpiaj” (Rom. 1:11, 12). Ken tikitaj, hasta Pablo kipolouaya kemantika makiyolchikauakan (**xpoua Romanos 15:30-32**).

⁴ Miyekej toknluan melak nokojtiliaj niman ijkon chikauak kitekichiuliskej Jehová. Ijkon kichiuaj precusores akin yolmelaujkej, misioneros, tlayekankej ipan circuito niman insiuauan, niman toknluan akin tekitij ipan se sucursal noso ipan se Kajli kampa Tlajtolkuepaj. Nochimej kinnamiki matikimijlikan ika melak kuajli ken tekichiuaj, niman noneki matikchikauakan. Niman toknluan akin chikauak okiteki-chiulijkej toTajtsin, san ika, pampa itlaj inpan

opanak aman xok uelij ijkon tekitij, melak kitlasojkamati matikinyolchikauakan.

⁵ ¿Akinomej noijki noneki matikinyolchikauakan? Toknluan akin xnonamiktiaj pampa kitlakamatij tlanauatijli tlen kijtous ika san manonamiktikan“ iuan se yejuan kineltoka toTeko” (1 Cor. 7:39). Se siuatsintli kineki ika iueuentsin makijli ika melak kitlasojtla niman kipatiojkaita nochi tlen kichiu (Prov. 31:28, 31). Niman xkipiya tikimilkauaskej toknluan akin yolmelaujkanemij maski kintlaueltokaj noso melak kualoj (2 Tes. 1:3-5). Jehová niman Jesucristo kinyolseuiya nochimej yejuin toknluan akin yolmelaujkanemij (**xpoua 2 Tesalonicenses 2:16, 17**).

TLAYEKANKEJ NOKOJTIILIAJ TECHYOLCHIKAUASKEJ

⁶ (**xpoua Isaías 32:1, 2**).^{*} Tinemij ipan ouijtika tonaltin, kuakon, kemantika xouijtika itlaj techyolkokos noso toyolajmanaskej. Jesucristo techmaka yolchikaualistli niman tlayekanalistli itechkopa “ikoneuan tekiuaj”, kijtosneki tlayekankej, akin tlapejpeniltin niman noijki akin nopouaj itech okseki borreguitos. Tlayekankej xkinnauatiaj ken tlaneltokaskej imiknluan, yejuamej tekitij inpampa niman ijkon mamelajkanemikan niman mapakikan. Yejuamej kinekij techpaleuiskej matipakikan niman matiyolmelaujkanemikan (2 Cor. 1:24).

⁷ Tlayekankej melak kuajli kichiuaj ijkuak kixkopinaj ineskayo apóstol Pablo. Yejua okintlajkuilouili akin kichiuayaj ken Cristo akin kintlaueltokayaj ipan Tesalónica: “Nemejuamej temechnpialiaj miyek tetlajsojtlalistli yejuan

^{*} Isaías 32:1, 2: “¡Xkita! Se tekiuaj tlanauatis ika melajkayotl, niman ikoneuan tekiuaj tlanauatiskej ika melajkayotl. Niman yeskej ken kampa nopaleuiyay ijkuak ejeka niman kampa nopaleuiyay ijkuak ajakakiyau, ken atl tlen notlaloua kampa tlaluaktli, ken itlaseuijlo tetl tlen onka ipan tlaluaktli”.

3. ¿Tlenon okiteititi apóstol Pablo itech titeyolchikauas? (Xkita tlaixkopinajli kampa peua tlen to-machtijtokej).

4, 5. ¿Akinomej noneki makinyolchikauakan aman, niman tleka?

6. Itech tlen kijtous Isaías 32:1, 2, ¿tlen tekitl kipi-yaj tlayekankej?

7, 8. Tlayekankej kinyolchikauaj imiknluan ika tlajtol-tin, san ika, ¿kenon noijki uelis kinyolchikauas-kej?

hasta tiknekiskiaj temechmakaskiaj, xsan yejua on kuajli tlajtojli yejuan kitemaka temakixtilis-tli, yej no hasta tonemilis pampa tejuamej ote-mechtlajsojtlakej sanoyej” (1 Tes. 2:8).

⁸ Pablo okiteititi ika kemantika xsan noneki titeyolchikauas ika tlajtoltn. Yejuin tlen okimijli tlayekankej akin chantiyaj Éfeso: “Noneki nentekitiskej niman nenkimpaleuiskej on yejuan itlaj kimpoloua. Niman xkelnamikikan on itlajtoltsin toTeko Jesús ken yejua okijtoj: ‘Más paki on yejuan kitemaka xken on yejuan kiselia’” (Hech. 20:35). Pablo xsan kinektoya kinyolchikauas imikniuan, noijki kinekiya kichiuas okseki. Okimijli: “Ikan kuajli noyojlo niktemakas nochi on tlen nikpia, niman xsan yejua on, yej nejua no niktemakas nonemilis ipampa nemoalma” (2 Cor. 12:15). Noijki ijkon, tlayekankej aman xsan kipiya ika kinyolchikauaskej niman kinyolseuiskej tokniuan ika tlajtoltn, noijki ika tlen kichiuaj. Ijkon kiteititaj ika yemelak najmanaj inpampa (1 Cor. 14:3).

⁹ Tlayekankej kemantika noneki kinnono-

9. ¿Kenon tlayekankej uelis kinnonotsaskej noso kinyektlaliskej imikniuan niman ijkon kuajli teyolchikauaskej?

tsaskej noso kinyektlaliskej imikniuan niman ijkon kinyolchikauaskej. Tla kinekij kuajli teyolchikauaskej, noneki kilnamikiskej tlen temachtia Biblia. Sakin ika omik niman oyoliuj, Jesús okitemakak se melak kuajli neskayotl itech yejuin, ijkuak ononek kinmelajkanotsas seki tlanechikoltin itech Asia Menor. Tlanechikoltin tlen onkatkaj ipan Éfeso, Pérgamo niman Tiatira kachtopa okimijli ika tlasojtlalistli tlen kuajli kichiuajtoyaj achto ika kinyektlalis (Apoc. 2:1-5, 12, 13, 18, 19). Niman tlanechikojli ipan Laodicea okijli: “On yejuan nikin-tlajsojtla, nikin-chikajkanotsa, niman nikincastigaroua ijkuak kichiuaj on tlen xkuajli. Yejua ika, xnechtlakamati ikan nochi moyojlo niman xmoyolpatla” (Apoc. 3:19). Yemelak, tlayekankej nokojtiliaj kixkopinaskej Cristo ijkuak noneki kinnonotsaskej oksekimej.

XSAN TLAYEKANKEJ NONEKI KINYOLCHIKAUASKEJ OKSEKIMEJ

¹⁰ Aman tej, xsan tlayekankej kipiya ika kinyolchikauaskej oksekimej. Pablo technauatia tinochimej akin tikchiuaj ken Cristo matikijto-

10. ¿Tlenon uelis tikchiuaskej tinochimej niman ijkon toyolchikauaskej semej iuan oksekimej?

Tajtin, ¿nenkinmachtijtokej nemokoneuan makinyolchikauakan tokniuan?

(Xkita párrafo 10).



kan “tlen kuajli yejuan kimpaleuis oksekimej noskaltis intlaneltok, niman kinmakas tlatio-chiualistli” oksekimej (Efes. 4:29). Kema ijkon, tinochimej noneki tajmanaskej inpampa tokniu niman tikitstoskej tlen kinpoloua. Pablo okimijli tokniu niman hebreos: “Xmoyoleuakan niman xmoyolchikauakan. Más xmouika-kan ipan on kuajli ojtli para on yejuan mechajtokaskej, maski xkojtikej ipan intlaneltok, ma ka nokuepaskej ipan xkuajli ojtli, yej más kitokaskej on kuajli ojtli” (Heb. 12:12, 13). Hasta telpokamej ueliskej kinyolchikauaskej tokniu niman ika intlajtoluan.

¹¹ Matikitakan tlenon ipan onochiuj se tokniu akini itoka Marthe,* yejua melak najmanaya. Marthe okijkuilo: “Se tonajli, ijkuak oniktlatlanilijka Jehová manechpaleui, oniknamik se tokniu akini iueyi katka. Niman yejuin tokniu onechmakak tlen nechpolojtoya: onechnots ika tlasojtlalstli niman teiknelilistli. Noijki onechijli ika yejua itlaj ijkon okixnamijka, niman yejuin okichiuj maka sa noselti maninomachili”. Kanaj tokniu akini iueyi nion xokinemili kenon itlajtoluan melak okipaleuijkej Marthe.

¹² Pablo okimijli yejuin akini nemiya ipan tlanechikojli tlen onkatka Filipos: “Yejua ika, xnechajxiltilikan on paktli. Xpiakan san se tlanemilijli. Cada se xmatikan san ikan se tlatlajsojtlalstli. San se moyojlo niman san se tlamachilistli xpiakan. Ma ka itlaj xchiuakan ikan nexikojli nion pampa nenkinetik nemoueyimatiskej, yej ikan yolyemanilistli xmatikan ika oksekimej más uejueyixtokej xken nemejuamej. Ma ka xchiuakan on tlen kuajli san para nemejuamej, yej no xkinchiuilikan on oksekimej on tlen no kuajli para yejuamej” (Filip. 2:2-4).

¹³ Yejuin tlaxeloltin techititaj ika tinochi-

* Seki tokayomej yonopatlakej.

11. ¿Kenon okipaleuijkej se tokniu ijkuak melak najmantoya?

12, 13. ¿Kenon uelis tikchiaskej tlen techijlia Filipenses 2:1-4?

mej noneki tokojtiliskej tiktaskej kenon uelis tikinyolchikauaskej tokniu. Uelis tikinyoltlaliskej, tikintlasojtlaskej, tikinyolchikauaskej, tikimititiskej ika tikiinekij niman tikimikneliskej (Filip. 2:1, *TNM*).

KEN UELIS TITEYOLCHIKAUASKEJ

¹⁴ Itlaj tlen melak techyolpaktia yejua tikmatiskej ika akin otikiminpaleuijkej yeuejkaui aman ok kitekichiuijtokej Jehová. Apóstol Juan okijkuilo: “Xitlaj onkaj yejuan más nechpaktia xken ijkuak nikaki ika nokoneuan kitlakamatij on tlen melauak” (3 Juan 4). Miyekkej precusores kuajli kijtouaj ika melak mitsyolchikauas tikmatis ika akin yeuejkaui otikmacti itech Biblia aman ok melajkanemi itech Jehová noso noijki yonochiuj precursor. Ika yejon, tla tikilnamiktia se precursor akin noyolajmana nochi tlen yokichiuj ipampa oksekimej, uelis kipaleuis kuajli manomachili.

¹⁵ Miyekkej tlayekankej ipan circuito yokijtokej kenon melak kuajli yonomachilijkej yejuamej niman insiuauan ijkuak kiseliaj se amatsintli kampa se tokniu kimijlia ika kitlasojkamati ika okitlajpalotoj tlanechikojli. Niman noijki ijkon kimachiliaj tlayekankej, misioneros, precusores niman betelitas ijkuak kintlasojkamachiliaj ken kuajli kitekichiuij Jehová.

TLEN TINOCHIMEJ UELIS TIKCHIASKEJ

¹⁶ Tla xsajnoye titenotskej noso xtikmatij tlenon tikijtoskej, xkipiya tiknemiliskej ika xuelis tikinyolchikauaskej oksekimej. Melauak, xouijtika tikchias. Se neskayotl, ijkuak tiktlajpalouaj se tokniu, uelis tikyejyekoskej tiktlajpaloskej ika pakilistli. Tla yejua xotechuetskili, kanaj pampa kixnamiktika se tlauejli niman kipoloua yakaj iuan tlajtos. Kanaj melak tikpaleuiskej kuajli manomachili tla tijkakij tlen techijlia (Sant. 1:19).

14. ¿Tlenon uelis melak teyolchikauas?

15. Xkijto se ken uelis tikinyolchikauas akin kuajli kitekichiuijtokej Jehová.

16. ¿Noneki miyek niman ijkon uelis yakaj tikyolchikauas?

¹⁷ Matikitakan tlen ipan onochiuj se tokniuj telpochtli akin itoka Henri. Yejua melak noyol-ajmanaya pampa miyekej ichanejkauan yoki-kaujkaj tlen melauak, se intech yejuamej katka itaj, akin se tlayekanketl katka akin kitlakaita-yaj. Pampa se tlayekanketl ipan circuito kiyol-chikauasnekiya Henri, okuikak kampa kine-makaj café niman kuajli okikak ijkuak yejua kijlitoya tlen kajmanaya. Henri okasikamat ika san uelis kinpaleuis ichanejkauan mauajno-kuepakan itech Jehová tla yejua yolmelaujka-nemi. Noijki okiyolchikauj kipouas Salmo 46, Sofonías 3:17 niman Marcos 10:29, 30.

¹⁸ ¿Tlenon tiuelij intech inneskayo Henri ni-man Marthe, akin onoteneuj ipan párrafo 11? Ika tinochimej uelis tikinpaleuiskej akin none-ki makinyolchikauakan. Tekiuaj Salomón okij-kuilo: “Se tlajtojli tlen noijtoua ijkuak no-neki, ¡melak kuajli!”. Niman noijki okijto: “Íxtololojtin tlen petlanij teyolpaktiaj; se kuaj-li tlajtojli kinchikaua omiyomej” (Prov. 15:

17. ¿Kenon okipaleuijkej se tokniuj telpochtli?

18. a) ¿Tlenon okijto tekuiuj Salomón? b) ¿Tlenon okijto apóstol Pablo?

23, 30). Tla tikitaj ika yakaj melak najmana, ¿tlenon uelis tikchiuaskej? Kanaj uelis tik-pouiliskej *Amatl Tekakistilijketl* noso itlaj tlen onka ipan página tlen tikpiyaj ipan Internet. Aman, Pablo noijki okijkuilo: “Xmomachtikan niman xmoyoleuakan iuan oksekimej ikan no-chi tlamatkilistli. Xtlakuikatikan itech Dios ikan tlaxtlauijli ipan nemoyojo. Xtlakuikati-kan salmos, tlakuikalmej de yekteneualistli ni-man tlakuikalmej itech Dios” (Col. 3:16; Hech. 16:25). Ken tikitaj, tokuikatiskej san sekan tla-kuikaltin itech Tekiuajyotl noijki uelis kichiuas kuajli matomachilikan.

¹⁹ Pampa inisiuj onka itonal Jehová, melak ueyi kijtosneki matoyolchikauakan semej iuan oksekimej (Heb. 10:25). Ika yejon, nochipa matiktlakamatikan yejuin tlen otechijli após-tol Pablo: “Xmoyoleuakan se iuan okse, ni-man xmoyolchikauakan ikan tlaneltoktli iuan oksekimej ijki ken nenkichijtokej” (1 Tes. 5: 11).

19. ¿Tleka aman melak ueyi kijtosneki matoyolchi-kauakan semej iuan oksekimej, niman tlenon none-ki tikchiuaskej?



Tinochimej uelis tikinpaleuiskej akin noneki makinyolchikauakan.
(Xkita párrafo 18).





Telpokamej, ¿nenkitejtemojtokej chikauak nenkitekichiuiliskej toTajtsin?

“Xtlaneltoka itech Jehová ipan nochi tlen tikchuias, niman nochi tlen yotiknemili tikchuias kuajli onkisas”
(PROV. 16:3).

XNEMILI ika tias uejka ipan autobús kampa nochuias itlaj tlen ueyi kijtosneki. Ijkuak tajsi kampa notelketsaj autobuses, mitsajmankamiktia tikitas ika melak tojlan niman miyekej autobuses. San ika, pampa kuajli tikmatstika kanon tikneki tias, tejua tontlamelaua kampa nemi autobús tlen mitsuikas kampa tiauj. Kuajli tikmatij, ika xtitejkos ipan se autobús tlen oksekan mitsuikas.

² Tonemilis ijkon ken uejka tias, niman telpokamej ijkon ken yejon tlaltikpakchanejkej akin nemij kampa notelketsaj autobuses. Pampa noneki miyek kitlapejpeniskej ipan innemilis, kemantika yejuin kinajmankamiktia. San ika, tla kuajli kimatij kanon kinekij yaskej, yejuin kinpaleuis makitlapejpenikan tlen kinuikas kampa kinamiki aj-siskej.

³ Yejuin tlamachtijli kinyolchikauas telpokamej makitejtemokan kiyolpaktiskej Jehová. Yejuin kijtosneki kitaskej tlen yejua kinemilia ipan nochi tlen kichuiaskej ipan innemilis, ken itech tlen nomachtiskej, tlen ipan tekitiskej niman itech inchanejkauan. Noiiki

1-3. a) ¿Tlenon kixnamiktokej miyekej telpokamej, niman tlen neskayotl uelis ika tikasikamatiskej? (Xkita tlaixkopinajli kampa peua tlen tomachtijtokej). b) ¿Tlenon uelis kichuiaskej telpokamej akin kichiuaj ken Cristo niman ijkon kuajli kixnamikiskej tlen inpan panoua?

TLAKUIKALTIN: 135, 144

¿KENON TITLANANKILISKIA?

¿Tleka melak kuajli tla timoyekana itech tlen kijtousa
Proverbios 16:3?

¿Itech tlenon uelis tiknemilis chikauak tiktekichiuilis toTajtsin?

¿Tlenon mitspaleuis maka tikixtenpolos tlen ueyi kijtosneki?

kijtosneki nokojtiliskej kichiuaskej tlen yokinemilijkej ipan itekiyo toTajtsin. Telpokamej akin kachtopa kitejtemouaj kitekichiuiliskej Jehová uelis kuajli kimatstoskej ika yejua kin-teochiuas niman ika kuajli onkisaskej ipan in-nemilis (**xpoua Proverbios 16:3**).*

¿TLEKA NONEKI XTEJTEMO CHIKAUAK TIKTEKICHIUILIS TOTAJTSIN?

4 Melak kuajli tla se kitejtemoua chika-uak kitekichiuilis toTajtsin. ¿Tleka? Ipan yejuin tlamachtijli, tikitaskkej yeyi tlen techititis ika yemelak ijkon. Kachtopa niman ika ome, mitsititis ika timokojtilis tiktejtemos chika-uak tiktekichiuilis toTajtsin mitspaleuis kuajli xmouika iuan Jehová. Niman ika yeyi, mitsititis kenon mitspaleuiya tiktejtemos yejon ijkuak ok titelpochtli.

5 Kachtopa tlen techititia ika noneki xtejtemo tiktekichiuilis toTajtsin yejua pampa ijkon tiktitia Jehová ika melak tiktlasojkamachilia ika mitstlasojtla niman noijki nochi tlen yokichuij mopampa. Se itekipanojkauj toTajtsin okijkuilo: “Kuajli tla tiktlasojkamachiliaj Jehová”. Niman sakin okijto: “Pampa tejua yotinechyolpakti, oh Jehová, ipampa tlen yotikchiuj; ipampa tlen yokichuijkej momauan nitsajtsi ika pakilistli” (Sal. 92:1, 4). Telpokatl niman ichpokatl, xnemili ipan nochi tlen Jehová yomitsmakak: monemilis, Biblia, tlane-chikojli, ika youel yotikixmat niman se tlamachialistli tlen melak kualtsin ika tlayekapan. Tla kachtopa kitejtemoua tiktekichiuilis toTajtsin ipan monemilis, xsan tiktitis Jehová ika tiktlasojkamachilia, noijki melak kuajli iuan timouikas.

6 Ika ome, ijkuak timokojtilia tikchiuas tlen

* Proverbios 16:3: “Xtlaneltoka itech Jehová ipan nochi tlen tikchiuas, niman nochi tlen yotiknemili tikchiuas kuajli onkisas”.

4. ¿Tlenon tikitaskkej ipan yejuin tlamachtijli?

5. ¿Tlenon techititia ika melak noneki xtejtemo tiktekichiuilis toTajtsin?

6. a) ¿Kenon mitspaleuis kuajli iuan timouikas Jehová tla tiktejtemoua tiktekichiuilis? b) ¿Tlenon uelis kitejtemoskej kichiuaskej kokonej?

yotiknemili ipan itekiyo toTajtsin, mitspaleuiya xchiua tlen kuajli niman Jehová kita. Yejuin noijki kichikaua ken iuan timouika. Apóstol Pablo kuajli okijto: “Dios yolmelajki. Yejua xkelkauas nemotekiu nion on tetlajsojtlalistli yejuan onenkititijkej” (Heb. 6:10). Maski se melak pitentsin, uelis kitejtemos kenon chika-uak kitekichiuilis toTajtsin. Xkimita yejuin neskayomej. Christine kipiaya 10 xiuitl ijkuak okijto kinpoujtias kampa tlajtoua itech in-nemilis tokniuán yolmelaujkej. Toby kipiaya 12 ijkuak okijto kipouas nochi Biblia achto ika noapolaktis. Maxim kipiaya 11 niman ikniuj Noemi 10 ijkuak onoapolaktijkej. Kuakon, omemej opeujkej tekiti niman ijkon ueliskej ajsiskej Betel niman ompa tlapaleuiskej. Pampa xkinekiyaj kilkauaskej, okitlalijkej ipan se intepan yejon amatl tlen kitemiltia akin kin-eki tlapaleuis Betel. Niman tejua, ¿tleka xtkinemilia tlenon uelis tikchiuas tlen tikitask ueyi kijtosneki niman tipeua titekiti itech yejon? (**Xpoua Filipenses 1:10, 11**).

7 Matikitakan ika yeyi tlen techititia tleka noneki tiktejtemos tiktekichiuilis toTajtsin. Ijkuak titelpochtli, noneki tiktlapejpenis tlenon timomachtis, kanon titekitis niman okseki ken yejuin. Tiktlapejpenis tlen tikchiuas yeskia kentla tiktlapejpenis kanon tias ijkuak tajsiskampa noxeloua ojtli. Tla kuajli tikmatstika kanon tikneki tajsisk, xouijtika tikitask tiktlapejpenis se ojtli. Noijki ijkon, tla kuajli tikmatstika tlenon tikneki ipan monemilis, kuakon xouijtika tikitask tiktlapejpenis tlenon tikchiuas. Proverbios 21:5 kijtous ika, akin kachtopa kuajli kinemilia tlen kichiuas, melak kuajli onkisas. Tla nimantsin tiknemilia tlenon tikchiuas niman tiktejtemoua tikchiuas tlen kuajli, kuakon nimantsin tikselsi tlateochialistlin. Yejuin tlen ipan onochuij se ichpochtli akin itoka Damaris ijkuak ononek kitlapejpenis itlaj tlen ueyi kijtosneki.

7, 8. a) ¿Tleka uelis tikijtoskej ika tiktejtemos kenon tiktekichiuilis toTajtsin mitspaleuis maka ouijtika xkita tiktlapejpenis tlen tikchiuas? b) ¿Tleka okitlapejpeni se ichpochtli xnomachtis ipan univ-ersidad?

⁸ Damaris otlán nomachtia ipan kaltlamachtijli nochi kech tekuiyajkej kitlajtlanij, niman pampa kuajli okisato okitekiuiltijkej se beca niman ijkon uelis nomachtis Derecho ipan universidad. San ika, yejua okitlapejpeni tekitis ipan se banco kampa san achijtsin tekistiskia. ¿Tleka? Yejua techijlia: “Nochipa onikijto ika niknekiya nitekitis ken precursora. Niman yejon kijtosnekiya ika san niktejtemoskia se tekittl kampa san achijtsin nitekitiskia. Tla ninomachtiskia Derecho, ueliskia niktlanis miyek tomin, san ika, kanaj xnixnextiskia kampa ueliskia san achijtsin nitekitis”. Aman, Damaris ikuika 20 xiuitl ken precursora. ¿Noyolkuepa itech tlen okitlapejpeni kichiuas ijkuak san ichpochtli katka? Ka. Yejua kijtoua: “Ipan banco, melak nitekiti imiuan miyekej abogados, akin kichiuaj tlen nejua nikchiuas-kia tla ninomachtiskia Derecho. San ika, miyekej melak xkinyolpaktia intekiyo. Pampa oniktapejpeni ninochiuas precursora, yejuin yokichiuaj maka ijkon maninokuajmana niman nochi yejuin xiujtín yonechpakti niktekichiui-lis Jehová ika pakilistli”.

⁹ Ipan tlanechikoltin tlen onka nochiuiyan ipan tlaltikpaktli, nemij melak miyekej telpokamej akin kinnamiki matikimijlikan ika kuajli kichiuaj pampa kitekichiui-liaj Jehová ika nochi inyojlo niman kitejtemojtokej kenon chikauak kitekichiui-liskej. Yejuamej noijki melak yolpakij ipan innemilis. San ika, noijki yuelkej ika noneki kikauiliskej Jehová makin-yekana itech nochi tlen kinekij kichiuaskej, ken itech tlen nomachtiskej, tlen ipan tekitis-kej niman itech inchanejkauan. Tekiuaj Salomón oteyolchikauj: “Xtlaneltoka itech Jehová ika nochi moyojlo”. Niman noijki okijto: “Itech nochi moojuuan xkauili mamitsyekana, niman yejua mitspaleuis xyolmelaujkanemi” (Prov. 3:5, 6). Jehová melak kinpatiojka-ita telpokamej akin kichiuaj ken Cristo. Yejua melak kintlasojtla, niman ika yejon, kintlajpi-ya, kinyekana niman kinteochiua.

9. ¿Tleka kinamiki matikimijlikan telpokamej ipan tlanechikojli ika kuajli tlen kichiuaj?

KUAJLI TIMOYEKTLALIS MITSPALEUIS TITLAJTOS ITECH JEHOVÁ

¹⁰ Tla se telpokatli kineki kitejtemos kiyolpaktis Jehová, noneki kuajli kitlachilis kenon tenojnotsa. Jesucristo otemachtli ika yejuin tekittl noneki nimantsin manochiua ijkuak okijto: “On kuajli tlajtojli yejuan kitemaka temakixtilistli achtoj noteijlis nochiuiyan” (Mar. 13:10). Ken tikita, titenojnotsas se tlen kachtopa noneki tiktejtemos. Ika yejon, ¿yotiknemili tiktejtemos miyekpa titenojnotsas noso kanaj timochiuas precursor? Aman tej, ¿tlenon uelis tikchiuas tla xmelak mitsyolpaktia titenojnotsas? Niman ¿tlenon mitspaleuis kuajli xkisati ijkuak titlajtos itech Jehová? Xchiua yejuin ome tlen tepaleuij: kuajli xmoyektlali niman maka xkajkaua tikimijlis oksekimej tlen tikmatstika. Kanaj mitsmojkatlachialtis tikitas ika melak mitsyolpaktis tikchiuas yejuin.

¹¹ Uelis tipeuas ika timoyektlalis tiknankilis itlaj tlen ueliskia mitstlajtoltskej akin imiuan timomachtia. Ipan jw.org niman okseki amatlajkuiloltin onka tlamachtiltin tlen onochijchijkej niman ijkon telpokamej mauelikan makiyektlalikan kenon kinankiliskej tlen miyekej tetlajtoltiaj. Se neskayotl, tlajtoltilistli “¿Tleka nitlaneltoka itech toTajtsin?”, tlen uajlauj ipan tlamachtijli “¿Nonekiskia nitlaneltokas itech evolución?” tlen onka ipan amatlajkuilolli *Nonankiliaj 10 tlen notlajtoltiaj telpokamej niman ichpokamej*, uelis mitspaleuis xyektlali kenon titlanankilis (**xpoua 1 Pedro 3:15**).

¹² Ijkuak tiuelis, xkimijli akin imiuan timomachtia makalakikan ipan página jw.org. Yejon tlen okichiuaj Luca ijkuak ipan kaltlamachtijli tlajtotoyaj itech seki tlaneltokiltin. Yejua okitak ika amoxtili kijtouaya seki

10. a) ¿Tleka titenojnotsas se tlen noneki kachtopa tiktejtemos? b) ¿Tlenon mitspaleuis kuajli xkisati ijkuak titenojnotsas?

11, 12. a) ¿Tlenon uelis kichiuaskej telpokamej niman ijkon ueliskej tlajtoskej itech tlen kimatij? b) ¿Kenon otlajto itech Jehová se telpokatli ipan ikaltlamachtli?



¿Kenon timoyektlalia niman ijkon
tikinnojnotsas oksekimej itech Jehová?
(Xkita párrafos 11 niman 12).

tlen xmelaauak itech iteixpantijkauan Jehová. Maski yejua nomojtiaya, okitlajtlanili akin kimaghtiya makikauili matetomili tleka xmelaauak katka tlen kijtouaya amoxltli. Okintomili tlen kineltoka imixpan nochimej niman noijki okimititi página tlen tikpiyaj ipan Internet. Tlamachtijketl okintlajtlanili nochimej ika ijkuak ajsiskej inchan makitakan video tlen itoka *Cómo defenderte sin dar un solo golpe*. Luca melak oyolpak pampa ouel otlajto itech Jehová.

¹³ Maka xmajmana tla ipan monemilis uajnesij tlaueitlin tlen xmitskauiliskej xchiua tlen yotikijto. Maka xkajkaua tiktejtemos tlen tikneki (2 Tim. 4:2). Yejon tlen okichiuaj Katharina. Ijkuak kipiaya 17 xiuitl, okijto kinnojnotsas nochimej akin imiuan tekitiya. Se itech yejuamej miyekpa okijli tlen xkuajli, maski ijkon yejua xonomojti. Ken kuajli noyekanaya okimojkatlachialti Hans, okse akin iuan tekitiya. Yejuin okichiuaj ika Hans mapeua kipoua toamatlajkuiloluan, okinek makimachtikan itech Biblia niman onoapolakti. Katharina xitlaj okimat itech yejuin pampa onochanpatlaka. 13 xiujtin sakín, yejua nemiya ipan Kajli kampa Tosentlaliaj iuan ichanej-

13. ¿Tleka xkipiya timajmanas ijkuak uajnesiskej tlaueitlin?

kauan niman omojkatlachix ijkuak okitak ika Hans yeskia akin kitemakaskia tlamachtijli. Niman yejon opanok pampa yejua xkeman okikauj tlen kinekiya kichiuas: kinnojnotsas akin imiuan tekitiya.

MAKA XKIXTENPOLO TLEN UEYI KIJTOSNEKI

¹⁴ Hasta aman, yejuin tlamachtijli yomitsyolchikauj melak xtejtemo tikyolpaktis Jehová ipan monemilis niman xtejtemo chikauak titekichiuilis. Kanaj oksekimej telpokamej nochipa san noyolpaktijtokej niman mitsyolchikauaj noijki xchiua tlen yejuamej kichiuaj. Ajsis tonajli ijkuak nonekis tikteititis tla yemelak tikneki tikchiuas tlen yotiknemili. Maka xkauili ika tlen oksekimej mitschiualtiaj makichia xkixtenpolo tlen tikchiuasneki. Oksejpa xnemili ika tinemi kampa notelketsaj autobuses. Kuajli tikmatstokej ika xtitledkoskia ipan se autobús san pampa nesi ika akin ompa yauiej noyolpaktijtokej.

¹⁵ Onka miyek tlen uelis tikchiuas niman ijkon tikixnamikis tlen mitschiualtiaj okseki-mej telpokamej. Se neskayotl, xtlalkaui nochi

14, 15. ¿Tlenon noneki tikilnamiktos ijkuak okseki-mej mitschiualtiskej itlaj xchiua, niman kenon uelis tikixnamikis?

tlen tikitas ika uelis kichiuas xpiya tlatlatalistin (Prov. 22:3). Niman xtlanemili itech kenon melak xkuajli tontlamiskia tla tikchiuas-kia tlen xkuajli (Gál. 6:7). Okse tlen noiiki mitspaleuis yejua tla tikselia ika noneki oksekimej mamitspaleuikan. Tla tiyolyemanki, tijkakis ika pakilistli ken mitsnonotsaskej motajuan niman oksekimej toknuijan akin chikauak intlaneltokil (**xpoua 1 Pedro 5:5, 6**).

¹⁶ Matikitakan tlen ipan onochiuj Christoph, akin onoyolyemani niman okichiuj tlen okijlikej. Sakin ika onoapolakti, opeuj yauj ipan gimnasio. Ompa okseki telpokamej okiyolchikaukej makalaki kampa yejuamej nauiltiyaj. Christoph okijli se tlayekanketl, niman tokniuj okijli ika achto kitlapejpenis tlen kichiuas makinemili tlenon ueliskia kixnamikis, kanaj sakin san kinekis tetlatlanis. Maski ijkon, Christoph okalak kampa okiyolchikaukaj. Sakin, okitak ika melak chikauak nauiltiyaj niman ika hasta ueliskiaj nokokoskej. Yejua otlajto imiuan oksekimej tlayekankej itech yejuin, niman nochimej okinonotskej itech tlen kijtous Biblia. Yejua kijtous: “Jehová okinuajtitlan toknuijan niman ijkon kuajli manechnonotsakan. Maski oniuejkauj nikchiuas tlen nechijliaya, oajsik tonajli ijkuak onikchiuj”. ¿Tikpiya yolyemanilistli tlen noneki niman ijkon tijkakis ken mitsnonotsaj?

¹⁷ Jehová mitsijlia: “Xyolpaki, telpochtli, ipan motelpochkayo, niman xchiua kuajli maonia moyojlo ijkuak titelpochtli” (Ecl. 11:9). Yejua kineki xyolpaki. Ipan yejuin tlamachtijli yotikitakej ika se tlen mitspaleuis ijkon mopan manochiua yejua tiktejtemos chikauak tiktekichiuilis niman nochipa tikitas tlenon kinemilia Jehová ipan nochi tlen tikneki tikchiuas. Tla nimantsin tipeua tikchiua yejuin ipan monemilis, noiiki nimantsin tikitas

16. Xteneua se neskayotl tlen kiteititia tleka ueyi kijtosneki tiyolyemanki yes.

17, 18. a) ¿Tlenon kineki Jehová ipan manochiua telpokamej? b) ¿Tlenon uelis tikchiuas aman ika titelpochtli niman ijkon sakin xmitsyolkokos tlen aman tiktlapejpenis tikchiuas? Xteneua se neskayotl.

kenon Jehová mitsyekana, mitspaleuiya niman mitsteochiua. Xtlanemili itech kenon melak kuajli mitsnonotsa ika Biblia niman xchiua yejuin tlajtolit: “Xkilnamiki, aman, moUeyitlachijchiujkauj ipan tonaltin ijkuak titelpochtlika” (Ecl. 12:1).

¹⁸ Xnochipa titelpochtli yes. Ajsis tonajli ijkuak tikitas ika yotieujiyak niman kanaj nion xotikitak kenon opanok. Teyolkoko, ika sekimej akin iuejueyimej najmanaj pampa okitejtemojkej tlen xtepaleui noso nion xitlaj okitejtemojkej, tlen sa noiiki melak taylorajmana. San ika, telpokamej akin ipan innemilis kitejtemojtokej chikauak kitekichiuiliskej toTajtsin melak yolpakiskej ijkuak ueyiyaskej. Ijkon nomachilia Mirjana. Ijkuak ichpochtli katka, yejua melak ueliya nauiltiyaj, ika yejon, okinotskej manotlatlaniti iuan oksekimej akin ualeuaj itech miyek países. San ika, yejua okitlapejpeni chikauak kitekichiuilis toTajtsin. Yopanok ipantsin 30 xiujtin, niman ok chikauak kitekichiuilis toTajtsin iuan iueuentsin. Mirjana techijlia: “Tiktejtemos miyekej mami-tsixmatstokan, tiueyixtos noso tiktlanis miyek tomin yejon itlaj tlen xmitspaleuis niman nion xuejkaui. Tlen kema melak mitspaleuis yejua tiktekichiuilis toTajtsin niman tikinpaleuis oksekimej makixmatikan”.

¹⁹ Telpokamej akin kitekichiuilij Jehová kinnamiki matikimilijkan ika kuajli tlen kichiuaj pampa kitejtemojtokej chikauak kitekichiuiliskej Jehová maski kixnamikij tlen ouijtika. Yejuamej nokojtiliaj tenojnotsaskej, kichiuaskej tlen yokinemilijkej ipan itekiyo toTajtsin niman xkikauiliskej ika yejuin tlaltikpaktli makichiuua makixtenpolokan tlen ueyi kijtosneki. Telpochtli noso ichpochtli, uelis kuajli tikmatstos ika tlen timokojtilijtika tikchiuas xsanenka yes niman noiiki ika nochimej toknuijan mitstlasojtlaj niman kinektokkej mitspaleuiskej. Tla nochipa tikita tlen kinemilia Jehová ipan tlen tikneki tikchiuas, kuajli tonkisas ipan monemilis.

19. ¿Kenon mitspaleuis tla tiktejtémoua tiktekichiuilis toTajtsin?

¿Tleka xkipiya ika tikintlaliskej ipan okseki páginas itech Internet iamatlajkuiloluan iteixpantijkauan Jehová?

■ Pampa ikalpan toTajtsin xkinmemaka iamatlajkuiloluan tlen tlajtoua itech Biblia, sekimej kinemiliaj ika uelisej kimixkopinaskej niman kintlaliskej ipan okseki páginas itech Internet noso ipan redes sociales (redes sociales kijosneki se página ipan Internet noso se aplicación kampa se ueli nonotsa imiuan oksekimej akin nemij noijki ipan yejon página ipan Internet noso yejon aplicación). San ika, akin ijkon kichiuaj xkitlakamatstokej Ken notlajtlani manotekitilti* páginas tlen tikpiyaj ipan Internet, niman yejuin yokichiuaj maonia uejueyimej tlaueitlin. Ompa kuajli noijtoua ika xakaj kipiya “kitlalis ipan okseki páginas, tlaixkopinaltin, amatlajkuiloltin tlen san tikitas ipan dispositivos, intokayo okseki marcas, tlakuikaltin, videos noso tlamachtiltin tlen onka ipan página tlen tikpiyaj ipan Internet (nion xuelis notlalis ipan redes sociales nion ipan páginas kampa ok-

* Uelis tiknextis tlen mitsititis Ken notlajtlani manotekitilti (Condiciones de Uso) tlatsintlan ipan ipeujyan página jw.org. Ompa noijtoua nochi tlen maka nochias ika nochi tlen notlejkoltia ipan páginas tlen tikpiyaj ipan Internet.

sekimej uelis kitaskej videos niman amatlajkuiloltin)”. ¿Tleka melak noneki manotlajtlani maka ijkon manochiua?

□ **Tiktlajpiyaj nochi tlen tiktletjkoltiaj ipan páginas tlen tikpiyaj ipan Internet.** Akin kixnamikij tlen melauak niman oksekimej taltitpakchanejkej kitlejkoltiaj toamatlajkuiloluan ipan páginas tlen yejuamej kipiya ipan Internet pampa ijkon kinyoltlanaj iteixpantijkauan Jehová niman oksekimej taltitpakchanejkej. San ika, ipan páginas tlen yejuamej kipiya noijki onka tlen kuajli yononemili niman ijkon mapeuakan manotlajtoltikan tla yemelak tlen kineltokaj (Sal. 26:4; Prov. 22:5). Oksekimej yokitlaliykej tlen kisa ipan toamatlajkuiloluan noso tlajkuiloltin jw.org ipan amamej kampa itlaj kitemachiltiaj, ipan tlen kinemakaj niman ipan aplicaciones tlen notemoltiaj ipan teléfono niman tabletas. Pampa tiktlajpiyaj nochi tlen tiktletjkoltiaj niman marcas tlen tikinchijchiuaj, ikalpan toTajtsin uelis kitekitiltis tlanauaitlin niman ijkon maka manochiua tlen xtitekauiliaj (Prov. 27:12). Tla ikalpan toTajtsin xtlaj kichiuaskia maski tla kimatiskia ika sekimej, maski Teixpantijkej, ki-

Tikintlajpiyaj toamatlajkuiloluan, kuakon, xakaj uelis kintletjkoltis ipan okseki páginas tlen onka ipan Internet.



tlalijtokej oksekan tlen tiktletjoltiaj ipan página tlen tikpiyaj ipan Internet noso kintekiltitjtokej tlajkuiloltin jw.org niman ijkon kinemakaskej itlaj, kuakon, tekiuaj-kej kanaj xtechpaleuiskiaj ijkuak tokojtíliaj tikinteltiskej akin techixnamikij noso akin tlanemakasnekij ika tlen totlatki.

□ **Xtiktekiltis jw.org ijkuak tikintemoltis toamatlajkuiloluan uelis melak mitsijtلاكos.** Jehová san kitekitiltia “tekittketl” yolmelaauk niman tlamachilise matechmaka tlamachtijli tlen ualeua itech toTajtsin (Mat. 24:45). Yejuin “tekittketl” kitemachiltia tlamachtijli tlen ualeua itech toTajtsin san ipan páginas tlen tikpiyaj ipan Internet, jw.org, tv.jw.org niman wol.jw.org. Noijki san yejuin yeyi aplicaciones tikpiyaj tlen notekitiltia ipan teléfonos niman tabletas: *JW Language*®, *JW Library*® niman *JW Library Sign Language*®. Uelis kuajli tikmatstoskej ika ipan yejuin aplicaciones niman páginas tlen onka ipan Internet xuajnesi tlen nonemaka niman tlen tsokuiltik tlen iyaxka Satanás. Tla tlamachtijli tlen ualeua itech toTajtsin tikseliaj itech okseki páginas tlen onka ipan Internet, xuelis tikmatiskej tla yokijtلاكojkej noso yokitsokuiloltijkej (Sal. 18:26; 19:8).

Noijki, tla yakaj kintlejkoltia toamatlajkuiloluan kampa uelis tikijkuilos tlen tiknemilia, kinkaulia akin kixnamikij tlen melauak niman akin techtejteneuaj maki-chiuakan ika oksekimej maka matlaneltokakan itech

ikalpan Jehová. Sekimej tokniuán yonokamatlatlankej ipan Internet, niman yejuin melak yokitsokuiloti itokayo Jehová. Kampa teuan timonojnotsas ipan Internet xompa kampa titemachtis ika yolyemanistli akin techixnamikij (2 Tim. 2:23-25; 1 Tim. 6:3-5). Noijki, yonomat ika yonochijchiujkej redes sociales niman páginas ipan Internet kampa kitekitiltiaj itoka ikalpan toTajtsin, itech Grupo akin Tlayekana ipan nochi tlanechikoltin niman itech akin teuan nemij ipan yejun grupo. Ika melak, nion se itech Grupo akin Tlayekana ipan nochi tlanechikoltin xkipiya se página ipan Internet tlen iyaxka nion xnemi ipan se red social.

□ **Ijkuak tikintitlanij oksekimej ipan jw.org, titepaleuiyaj manosemoyaua “kuajli tlajoltin”** (Mat. 24:14, TNM). Tlen techmakaj niman ijkon matiktekiltikan ipan dispositivos niman ika matitenojnotsakan noyenkuilijtiuj. Niman tiknekij ika nochimej itech manopaleuikan. Yejua ika, ijkon ken noijtoua ipan Ken notlajtlani manotekitilti página tlen tikpiyaj ipan Internet, kema uelis yakaj tiktlaniliskej se amatlajkuilolli noso tlen makititlani ipan jw.org niman ijkon ompa makitemolti. Ijkuak tikintitlanij taltikpakchanejkej akin kinekij kimatiskej tlen melauak ipan páginas tlen tikinpiyaj ipan Internet, tikchiuaj ika yejuamej manonisiuikan itech “tekittketl” yolmelaauk niman tlamachilise, akin san yejua kitemaka tlamachtitin tlen ualeua itech toTajtsin.

San nikan kampa uelis tomachtiskej itech toTajtsin



PÁGINAS TLEN TIKPIYAJ
IPAN INTERNET



jw.org



wol.jw.org



tv.jw.org



APLICACIONES
TLEN TIKPIYAJ



JW Language®



JW Library®



JW Library Sign Language®



¿Tlajtoua Salmo 144:12-15 itech ikalpan toTajtsin noso itech xchanejkej akin kichiuaj tlen xkuajli tlen noteneua ipan tlaxelojli pitentsin 11?

■ Ken noiikuiloua tlajtojli hebreo kipiya miyek ken uelis nasikamatis. Kuakon, aman ika itikmatij yejuin, matikitakan tlen techpaleuis kuajli matikasikamatikan:

1. Xtlanemili itech okseki tlen kijtousa salmo. Pampa notekitiltia tlajtojli “kuakon” ipan tlaxelojli 12, nasikamati ika tlateochiualistin tlen noteneuaj ipan tlaxeloltin 12 ontlami ipan 14 inpan nochiua akin *yolmelaujkej*, akin kitlajtlanij makinmakauakan niman makinmakixtikan itech akin xkuakualtin (tlaxelojli 11). Tlen nasikamati nikan noiiki nesi ipan tlaxelojli 15, kampa okpa nesi tlajtojli “yolpaki” niman noiiki tlajtoua itech *yejon kalpan*: “akin iTajtsin yejua Jehová”.

2. Yejuin tlen nasikamati notlajtolnamiki iuan okseki tlen onka ipan Biblia tlen kijtousa ika Jehová kiteochiuas ikalpan. Yejuin salmo tlajtoua ika David melak kuajli kimatstoya ika sakin ika toTajtsin kimaixtiskia kalpan Israel itech itlaueliknivan,

yejua kiteochiuaskia ika pakilistli niman kichiuaskia maka itlaj makipolo (Lev. 26:9, 10; Deut. 7:13; Sal. 128:1-6). Se neskayotl, Deuteronomio 28:4 kijtousa: “Tlateochiuutin yeskej mokoneuan niman itlakilyo motlal niman ikoneuan moyolkauan, ikoneuan mouakaxuan niman moborreguitos”. Niman ijkuak otekiauajtik Salomón, ikoneuj David, kalpan Israel onen ika yolseuilstli niman xtlaj kipolouaya ijkon ken xkeman panouaya. Niman xsan yejon, tlen onochiuj ijkuak otekiauajtik kineskayotia kenon yes ijkuak tlanauatis Mesías (1 Rey. 4:20, 21; Sal. 72:1-20).

Kuakon uelis tikijtoskej ika yejuin tlen nasikamati itech Salmo 144 kichiuas ika nochi salmo melak kuajli makiteititi tlamachialistli tlen itekipanojkauan Jehová melak kinekij manochiua: ika toTajtsin kinpopolos nochimej akin xkuakualtin, niman ika akin yolmelaujkej kiseliskej yolseuilstli niman xtlaj kinpolos (Sal. 37:10, 11).

